


MGA PANGUTANA

UG MGA TUBAG

 Maayong gabii, mga higala, maayo gayud ang mahianhi dinhi karong gabhiona. Ug ako . . . sa paagi nga kining tanan medyo miabot kanako, maoy tungod nga ako . . . gihunahuna ko kaganinang buntag ang akong igsoon, ug kabalo man gud ko kung unsa ang buot ipasabot sa duha ka panerbisyo sa usa ka adlaw.

² Ug ako—aduna ako’y gamay’ng sst sa akong tutunlan. Permi man gud ko gawali. Ug dayon pag-abot ko sa siyudad, sa niining walog, ang gamay’ng lingagngag ko dinhi sa ilalum tungod sa kung unsang klaseng . . . kini, gitawag nila kini . . . Kining klima dinhi sa walog, ginapasamot pa niini ang hubag nga kanunay kong kinahanglan motulon nga motulon samtang nga ania ako dinhi sa walog. Ug niadtong milakaw ako, pipila ka adlaw, nawala kini. Sa pagbalik nako, mibalik na pud kini pag-usab.

³ Ug medyo nahingawa ako kang Igsoong Neville, ingon nga nasayod ko nga—nga kami medyo malayo-layo na among nabiyahé kay sa uban sa inyo nga mga batan-on pa, ug busa lahi na ang paglantaw namo niini. Mao nga medyo may paghunahuna kami sa usa’g usa, ug ilabi na karon nga nagasingabot na ang mga adlaw, nagasingabot na ang dautang mga adlaw. Ug dayon ang mahibaloan nga mobiya na pud kami, sa gilayon, kung itugot sa Ginoo.

⁴ Ug nahunahuna ko, kabalo mo, nga si Igsoong Boze moanhi sa sunod nga Dominggo sa gabii, sa pagtoo ko. Akong . . . Nabalitaan n’yo ba kana? Oo, ug sa sunod Dominggo sa gabii. Aduna siya’y usa—usa ka salida nga gusto niyang ipakita, mahitungod sa iyang mga pagmisyón sa gawas sa nasud kon diin . . . Nagkaaduna siya og usa—usa ka damgo nga miabot kaniya daghang tuig na ang milabay, mahitungod sa iyang pag-adto sa Chigaco. Ug kining luoy’ng igsoon nabalaka gyud siya niadtong panahona, ang ingon niya nga wala pa kono natuman ang iyang mensahe. Ug gisaysay ko kaniya kung unsa nga gituman na kini sa Ginoo. Dayon nasabtan niya kini.

⁵ Busa gihatagan siya sa Ginoo og usa na usab ka damgo. Ug dayon sa dihang miabot ang interpretasyon niadto, gisulti kaniya kung asa siya angay’ng moadto ug kung unsa’y buhaton. Ug miadto siya didto ug, grabe gyud, oh, grabe, didto siya sa Kenya ug Tanganyika ug Uganda, ug niadtong mga nasud didto, makahibulongan gayud ang mga gibuhát sa Ginoo para kanila sa ilang mga pag-misyón. Ug gusto niyang ipakita ang salida niini,

para maipakita lang kung unsa na ang ginabuhay sa Ginoo sa taliwala niadtong mga tawo nga atua didto, sa mga tribo didto sa Africa. Kon itugot sa Ginoo, sa Enero, gusto kong mouban sa iya didto para sa . . . ug kanila taliwala niadtong mga tribo, alang sa usa ka panagtigum sa dili pa ako moadto sa Rhodesia ug South Africa pag-usab.

⁶ Ug, dayon, sa umaabot na kana nga Dominggo sa gabii, busa hinumdomi ninyo, karon. Ug iampo gyud og maayo si Igsoong Joseph, dugay na siyang ingon niana ka buotan nga igsoon. Ginapasalamat ko gayud siya, ang iyang pagpakig-fellowship ug uban pa.

⁷ Dayon, sa umaabot niining sunod semana, molarga kami padulong sa . . . paingon sa Southern Pines, ug dayon sa Columbia, South Carolina; ug dayon gikan didto padulong na usab sa Cow Palace, sa West Coast, dayon ngadto sa Grass Valley; ug didto pud sa World Fair, ug balik na pud sa Oregon; dayon didto na usab sa British Columbia, ug uban pa, direktang hangtud sa katapusan na niining panahon sa tinglagas. Dayon nanghinaut kami, sa niining panahon sa tinglagas, kon itugot sa Ginoo, makapahigayon kita og ubay-ubay pud nga mga panagtigum dinhi, kung ihatag kini sa Ginoo.

⁸ Dayon nahunahuna ko, sa dili pa ako mogikan, maayo siguro kung makapangutana ako og pipila ka mga pangutana. Kabalo mo, mahibaloan mo man gud kung unsa ang anaa sa kasingkasing sa mga tawo kung mangutana ka. Ug busa nahunahuna ko, kabalo mo, unyang gabii, magkaaduna unta kita og usa ka gamay'ng kinasingsing nga pagpakighinabi uban sa—sa gamay'ng panon, sa mga tawo dinhi, nga—nga makighinabi sa inyo nga gikan sa—gikan sa atong mga kasingkasing. Usahay mahunahuna ko nga mas makahatag kana og kaayohan kay sa magwali og usa ka sermon, kanang medyo masabtan nato ang usa'g usa.

⁹ Mapasalamaton gyud kita sa Dios tungod sa nasaksihan nato sa mga gibuhay Niya niining semanaha ingon nga tubag sa pag-ampo, nga talagsaon kaayo. Ug busa mapasalamaton kita, mapasalamaton kaayo.

¹⁰ Ug nakita nato nga nagsingabot na ang panahon ug ang katapusang panahon, nga nahibalo nga aduna gyu'y butang nga andam nang mahitabo. Ug wala'y tawo nga wala mahibalo nga kini tinuod, kung siya usa ka—kung siya usa gyud ka tighunahuna. Kabalo kita, nga sa tanang mga kapanahonan mao kana ang atong ginapaabot, ang ginabantayan sa matag usa. Pero, kabalo mo, daghan na kaayo ang nangahitabo karon. Kita—kabalo kita nga husto kana . . . dili na mahitabong layo pa. Ug karon siguro maghisgot ako mahitungod sa pipila niana sa kadali.

¹¹ Pero ato karon, isip pagsugod, iduko sa' nato ang atong mga ulo alang sa pag-ampo. Ug samtang nakaduko ang atong mga ulo, nahunahuna ko kung aduna ba sa atong mga kasingkasing, nga buot magpahinumdom diha sa pag-ampo atubangan sa Dios. Kung ingon niana man, ipataas lang ang inyong kamot. Masabtan Niya, hingsayran Niya ang tanan mahitungod niini. Pipila lamang ka hangyo nga buot ninyong isulti, "Dios, hinumdomi ako." Panalanginan sa Ginoo ang matag usa kaninyo.

¹² Among Langitnong Amahan, sa among pagduol karong gabhiona sa Trono sa grasya, nga magrasyanhong Mo kaming ginapaduol nga may kaisog atubangan sa Trono sa Dios ug sa Iyang grasya, aron pangayoon ang bisan unsang hangyo nga gikinahanglan namo. Nagsulti Ka kanamo nga kung kami mahimong ingon ka daghan sa duha o tulo nga magkatigum ug magakatigum diha sa Imong Ngalan, mamaania Ka sa among taliwala. Ug dayon kung unsa man ang among gitinguha, kung ihangyo namo kini, mamadawat gayud namo kini kung amo lamang toohan nga mamadawat namo kini.

¹³ Nahibaloan Mo ang mga kahintang sa panahon ug ang kahintang sa iglesia ug sa mga tawo, ug sa mga hangyo namo sa Imong atubangan. Karon, nakita Mo ang mga kamot, Ginoo. Nahibaloan Mo ang mga kasingkasing sa mga tawo, ug ang ilang mga tinguha ug ang ilang mga panginahanglan. Ug nakita namo nga nagakahaduol na ang panahon, hinay-hinay na kini nga nagakatapok karon, ang dakung mga panganud nagapahimutang na didto. Ang mga butang nga gisulti sa mga propeta gatusan ka tuig na ang milabay, nga nakita namo nga wala pa sukad mahitabo hangtud niining panahona, ug ania gyud nakita na namo kini sa amo mismong panahon.

¹⁴ Karon nagaampo kami, Amahan, nga Imong ihatag sa amo kining mga panalangin nga among ginapangamuyo. Ayoha ang mga masakiton ug ang mga nanag-antus. Ibalik ngadto sa Imong Iglesia, Ginoo, ang buhi nga gahum sa Balaang Espiritu, ang buhi nga pagtoo nga among gipangamuyo tungod kay kami nagatoo. Nagatoo kami nga madawat namo kini tungod kay sigurado kami nga kabubut-on sa Dios nga ihatag kini kanamo sa wala pa namo gipangayo. Wala kami nagapangayo nga simang, nagapangayo kami alang sa Gingharian sa Dios, busa nagaampo kami nga Imong itugot kini kanamo.

¹⁵ Panalangini ang among panagtigum, ang among pastor, ang mga mamumuo sa iglesia, matag tawo, ang mga sakop sa Lawas ni Cristo nga ania karon. Kadtong mga dili sakop sa Lawas ni Cristo, nga nangita niining panahona og kapasilongan sa bisan asa, nga nagapatukod og kapasilongan batok sa bomba luyo sa ilang nataran, Dios, manggiduol unta sila ilalum sa kapasilongang proteksyon ni Ginoong Jesus, sa pagpanghibalo

nga sa dihang natapos na kining kinabuhia adunay Kinabuhi pagkahuman niini. Salamat Kanimo tungod niining saad.

¹⁶ Ihatag kanamo ang tubag sa niining mga pangutana karong gabhiona, aron nga among matagbaw ang matag kasingkasing pinaagi sa Imong Pulong. Kay amo kining ginapangamuyo sa Ngalan ni Jesus. Amen.

¹⁷ Nagakahaduol na ang pag-abot sa Ginoo, daw sa unsa nga kasiguradohan kini!

¹⁸ Sa pagpamulong ko kaganina, adunay miingon og usa ka butang mahitungod sa *insurance*, Kauban ko niadto ang kapunongang Business Men dili pa lang dugay didto sa usa sa ilang mga kombensiyon, usa ka internasyonal nga kombensiyon. Bag-ohay lang ako nakatambong og usa, pang-rehiyonal. Nagapamulong man gud ko para sa Full Gospel Business Men, sa tibuok kalibutan. Ug dayon kining—kining kombensiyon ingon nga gipahigayon didto sa West Coast, ug atua didto nanaglingkod ang tanan nga mga inilang tawo gikan sa tanang bahin sa kalibutan, nga . . . nakapamostura og mga halangdon. Ang sulti sa ako sa usa sa ila, “Nadungog ko nga adunay nagtawag sa imo nga ‘Reverend.’”

Miingon ko, “Oo, sir.”

Miingon, “Usa ba ikaw ka magwawali?”

Miingon ko, “Oo, sir.”

Ingon niya, “Unsa kining ginabuhat mo kauban ang mga negosyante?”

Ingon ko, “Ako—usa man ako ka negosyante.”

“Oh?” Miingon, “Unsa bang klase ang negosyo mo?”

Ingon ko, “Assurance.”

¹⁹ Sayup ang pagkasabot niya sa ako, ang hunahuna niya nga ang buot kong ipasabot maoy insurance. Busa ang ingon niya sa ako, ingon niya, “Sa unsa man nga kompanya ka?”

Ingon ko, “Sa Langitnong Kompanya.”

Ingon niya, “Mora’g wala ko kabalo niana.”

Ingon ako—miingon, “Unsa man—unsa man diay nga klase sa insurance ang imong ginabaligya?”

²⁰ “Wala ko . . .” Ingon ko, “Wala ko nagsulti nga *insurance*, ang gisulti ko *assurance*.”

Miingon, “Unsa ma’y buot mong ipasabot?”

Ingon ko:

Ang mapanalanginong assurance, nga si Jesus ania kanako!

Oh, pagkaanindot nga pasiunang Balaanong himaya!

Manununod sa kaluwasan, nga gibayran na sa
Dios,
Natawo na sa Iyang Espiritu, og hinugasan na
sa Iyang Dugo.

²¹ Busa, niadtong gabhiona sa dihang gipaila-ila ako para sa sibya, gisulti ko kadto. Ug miingon ko, “Karon, ako—aduna ako og mga insurance policy dinhi para sa bisan kinsa sa inyo dinhi o sa tibuok nasud, nga interesado sa maong policy, gusto kong makighinabi sa inyo pagkahuman sa mismong panerbisyo. Assurance, mapanalanginong assurance!”

²² Karon, nahunahuna ko, sa pagpangutana niining mga pangutana, nga basin mahatagan ako niini og gamay’ng sigpat sa inyong—inyong hunahuna. Aduna ko’y duha. Pagsulod ko sa pultahan ang ingon sa ako ni Billy nga daghan pa kono, pero, siyempre, wala na ako nagkaaduna og panahon para tun-an pa ang mga niini. Ug gusto kong makasiguro nga husto ako basi sa Kasulatan sa dili ko pa kini tubagon, tungod kay kamo. . . gusto ko kini nga mahimong ingon niana, o sa dili pa kini tubagon. Busa siguro mahimo kong iuswag ang mga niini para sa ubang panahon. Karon, ang usa sa. . . Ug sa pagtubag sa niining mga pangutana karon, hinumdomi ninyo, ginabuhat ko lang ang kutob sa mahimo ko.

²³ Wala ako nagatubag og mga pangutana diha mismo sa mga panerbisyo. Gisulayan ko kini usa niana ka higayon ug nagkaproblema gyud. Nasayup na hinoon sila sa pagsabot nako. Mahitungod kadto kang Mr. Allen, o mahitungod sa ebidensya nga dugo ug lana ug uban pa, diha sa mga kamot ug nawong, ingon nga ebidensya kono sa Espiritu Santo. Miingon ko, “Buena, wala ko kabalo bahin niana,” miingon ko, “Wala pa ko’y nakitang unsa man mahitungod niana diha sa Kasulatan.” Miingon ko, “Pero ako—nagatoo ko nga kung akong. . . kung makawali lang ako nga sama niining igsoon, dili ako magaaagad sa mga sensasyon. Iwali ko lang ang Ebanghelyo,” ug uban pa.

²⁴ Ug nagpagawas sila og sulat, sa tibuok kalibutan, “Minahal nga Igsoong Branham. . .” busa mikaylap kini bisan asa. Ug nasayup sila sa pagsabot niadtto. Ug gipadal-an namo sa ila og mga teyp ug gipapa-play kini sa ila ug aron makita nila nga akong. . . Ang sulti ko man gud kono nga akong “gikondena ang maong tawo.” Ako—wala ako nagkondena. Wala gyud ko sukad nagkondena ni bisan kinsa nga igsoon. Siguro usahay dili ako mouyon kanila, pero sa mahigalaon kana nga paagi.

²⁵ Ug dayon dinhi dili pa lang dugay adunay nagsulat og libro mahitungod sa niining lalaki, nga giulohan og, *Biting of Devils*. Dayon nahunahuna ko nga kahigayonan kadto nga sultihan siya o aron ipahibalo sa iya. Ug ang tanang ebanghelista nga anaa sa natad sa pagpang-misyon gawas kanako gisaway sa tawo nga nagsulat sa maong libro, ug naglingkod siya didto sa

panagtigum ko, busa ingon ko, “Gipasalamat ko nga wala . . . ako sa kritisismo, pero . . .” Miingon ko . . . Ang igsoon, sa tinuod lang, gidayeg niya ako diha sa *Christian Digest*, ingon niya nga ako ra kono ang wala sukad nagpakolekta og mga offering ug wala nagpakilimos og kuwarta sa mga tawo, ug uban pa nga ingon niana, ug gidayeg niya kono kini. Ug atua siya nga naglingkod didto. Pero kahigayonan kadto tungod nga kabalo ko nga aduna siya’y gisulti mahitungod kang Igsoong Allen nga dili husto.

Ang ingon niya, “Si A. A. Allen ang nagsulat niining libro nga *Biting of Devils*.”

²⁶ Karon, wala sukad gisulat ni A. A. Allen kadtong libro. Nakaila ako sa magsusulat sa maong libro. Ug miingon ko, “Karon, kung dili ingon ka sinsero ang tawo nga nagsulat niini para adtoon unta ug hibaloon kung kinsa gyud ang nagsulat sa maong libro sa wala pa niya unta gisaway si Igsoong Allen, medyo nagatoo ko nga ang uban niyang mga kritisismo sa niining mga kaigsoonan dili husto.” Tan-awa? Ug nagalingkod didto mismo kadtong tawo nga midayeg kanako. Pero pagpahibalo lamang kadto sa iya nga sayup ang iyang pamahayag, nakita n’yo, nga wala gyud gisulat ni Igsoong Allen kadtong libroha, kadtong sinulat nga *Biting of Devils*.

²⁷ Karon, sa pagtubag sa niining mga pangutana, mga pinakamaayo kini kutob sa nahibaloan ko. Ug kung . . . paningkamotan kong tubagon ang mga niini pinaagi sa mga Kasulatan.

²⁸ Bueno, makita ang una, nagatoo ko, sa Unang Mga Taga-Corinto, sa ika-7 nga kapitulo ug sa ika-15 nga bersekulo. Busa karon moadto kita sa nianang Kasulatan ug tan-awon nato kung unsa ang ginapakita niini, ug tan-awon kung matabangan nato kining bililhong tawo nga nangutana. Karon. Unang Mga Taga-Corinto, ika-7 nga kapitulo, ika-15 nga bersekulo. Ug nagatoo ko nga ania karon ang maong tawo nga nangutana. Bueno ingon niini ang mabasa Dinhi:

Apan kon ang dili pa minyo buot mobulag, pabulaga siya. Kay ang igsoon nga lalaki kon babaye wala sa ilalum sa pagkaulipon niini nga butang: hinonoa nga gitawag kita sa Dios ngadto sa pakigdait.

169. Karon. **Unang Mga Taga-Corinto, ika-7 nga kapitulo, ika-15 nga bersekulo.** Karon ang gipangutana nila: **Igsoong Branham, ang buot ba ipasabot niini nga ang usa ka igsoong babaye o usa ka igsoong lalaki gawasnon nang magminyo pag-usab? Dili.**

²⁹ Kita n’yo, Wala n’yo nakuha ang pangutana niya dinha ug ang iyang ginasulti. Dili sila gawasnon. Kita n’yo, supakon man gud niana ang Kasulatan, ug wala sukad ginasupak sa mga Kasulatan ang kaugalingon niini sa unsa mang paagi. Kita n’yo?

Karon, atong... Nakita n'yo, mora ba og ginahimo n'yo ang Kasulatan (sa pagbasa lang sa usa ka bersekulo) nga isulti ang unsa mang butang nga gusto n'yong isulti niini, para mohaum sa inyong hunahuna. Apan kinahanglan n'yong kuhaon ang hunahuna nga ginahisgotan niini.

³⁰ Sama sa kung—sa kung nakigsulti ako kang Igsoong Neville ug imong—ug imong nadungog nga gisulti ko ang pulong, “board.”

³¹ Ug dayon molakaw ka, moingon ka, “Kabalo ba mo kung unsa ang gihisgotan niya? Gilaay kono siya sa ato karong gabhiona.” Kita n'yo? “Dili,” mosulti pud kadtong usa, “sayup kana, ang buot niyang ipasabot nga siya—aduna siya'y bayronon nga board bill, pagabayran na niya kini.” Ang ang usa pa moingon, “Oh, dili, dili ingon niana ang buot niyang isulti, ang buot niyang ipasabot kadtong tabla sa kilid sa balay.” Ug isulti pud niadtong usa pa, “Dili, isulti ko sa inyo kung unsa, sa hunahuna ko nga ang gipaningkamotan niyang isulti mao'y pagbangag og usa ka lungag.” Kita n'yo? Kita n'yo?

³² Kinahanglan n'yong hibaloan ang maong pagpakighinabi, dayon ayha ninyo mahibaloan kung mahitungod ba sa unsa ang ginahisgotan ninyo, tungod kay usahay ginatubag pud ni Pablo dinhi ang ilang pangutana.

³³ Usahay ginasulti sa uban, “Ginasupak man sa Biblia ang Kaugalingon Niini.” Gusto kong pangitaon kana. Dili Kini ingon niana. Ako—mokat na sa traynta'y-dos ka tuig ako sa likod sa pulpito, wala pa akong nakita nga kontradiksyon. Kita n'yo? Wala Niini ginaspak ang Kaugalingon Niini! Kini'y... Kamo ang nagapasapak Niini, kita n'yo, ug ang wala nakasabot Niini. Ang Balaang Espiritu mao ang Tigpadayag, ang Tigbutyag sa Pulong. Busa, ang kontradiksyon...

³⁴ Kita n'yo, gisulatan ni Pablo ang maong mga tawo, nga nagaingon, “Nangutana kamo og *ingon niini-ug-ingon niana* nga butang.” Bueno, dili lang nga ginaingon niya nga gipangutana n'yo kini, iya mismo kadtong *ginasulti*. Dayon ania siya nga milingi ug gitubag sila, nga sukwahi sa ilang gipangutana.

³⁵ Gipangutana nila, “Ginabuhat namo ang *ingon-ani*, ug *ingon-ana*, ug *ingon-ani*.” Ug milingi si Pablo ug gisulti ang butang nga lahi, kita n'yo, nga mora ba'g sukwahi. Dili gyud. Kung basahon lang ninyo ang tibuok nga bersekulo, ang tibuok nga kapitulo, makita ninyo nga siya—gapaningkamot siya nga isaysay kung unsa ang gisulat nila kaniya.

³⁶ Karon, ania mismo ang mora og magahatag... Ug sa ingon nianang paagi kamo nagakaaduna og mga kontradiksyon sa Biblia, pero dili kana kontradiksyon. Karon, mora ba'g, dinhi, gustong mahibaloan sa nangutana, o ang buot mahibaloan sa ilang pangutana:

Ang usa ka igsoong lalaki o igsoong babaye ba sa Ginoo, mahimong magminyo o magminyo pag-usab ug mahimong gawasnon, kung biyaan nila ang ilang mga kapikas aron magminyo pag-usab? Dili.

37 Karon kuhaon nato . . . sugdan sa ika-10 nga bersekulo:

. . . ako nagasugo sa mga nangaminyo na, dili ako, kondili ang Ginoo, (Kita n'yo?), Nga ang asawa dili magbulag gikan sa iyang bana: (Kita n'yo?)

Apan . . . kung ang asawa mobulag gyud, kinahanglan magapabilin ang asawa nga mag-inusara, kon makig-uli hinoon siya sa iyang bana: ug nga ang bana dili gayud magbulag sa iyang asawa. (Kana ang mga Sugo sa Ginoo, kita n'yo.)

Apan mahitungod sa uban nagaingon ako, dili ang Ginoo: (Kita n'yo?) Kung adunay igsoon nga may asawa nga dili matinohon, . . .

38 Karon, matikdi ang iyang ginahisgotan, kita n'yo. Ug ipadayon ninyo sa ubos ang pagbasa sa dili pa kini, sa tibuok nga kapitulo, makita ninyo nga ang pagdahum nila, “Kung nagminyo kita sa babaye ug siya’y . . . kita . . . naminyo ako ug nahimo akong usa ka magtotoo, ug dili magtotoo ang akong asawa, mahimo ko siyang bulagan.” Oh, dili. Dili kana mao. Dili ninyo puede kana buhaton, Kita n'yo? Kita n'yo:

. . . Kung adunay igsoon nga may asawa nga dili matinohon, ug miuyon siya nga makigloon kaniya, dili niya pagbulagan siya. (Kana’y, dili tungod sa kaminyoon, tungod kana sa dili-pagtoo. Dili “magminyo na pud” pag-usab. Kita n'yo, magpabilin ka uban kaniya!)

Ug kung ang asawa nga may usa ka bana nga dili matinohon, ug kung ang lalaki malipayon nga makigloon sa babaye, dili niya pagbulagan ang iyang bana. (Husto kana! Kita n'yo?)

Kay ang bana nga dili-matinohon ginabalaan diha sa asawa, ug ang asawa nga dili-matinohon ginabalaan tungod sa iyang bana: kay sa lain nga paagi ang inyong mga bata mga dili-putli; apan karon mga balaan sila.

Ngani kung ang dili-matinohon mobulag, pabulaga siya.

39 Karon, kung ang dili-magtotoo mosulti’g, “Dili na ako manimuyo kauban nimo, nahimo ka nang Cristohanon.” Sa . . . Pag-isulti sa usa ka lalaki sa iyang asawa, “Tungod kay naluwas ka na, ug mobiya na sa kalibutan kon diin magkauban kita kaniadto, biyaan ko ikaw.” Karon, wala ka na’y mahimo pa bahin niana, pabulaga siya. Kita n'yo?

40 O sultihan sa babaye ang iyang bana, “Ayaw kong makig-uban nianang pundok sa mga holy-roller. Dili ko buhaton kini! Biyaan ta ka og bulagan ka.” Ayaw biyai ang iglesia, pasagdi nga siya ang mobiya. Kita n’yo?

41 Ang usa ka igsoong lalaki o usa ka igsoong babaye wala napailalum sa pagkaulipon sa ingon nianang kahimtang, kanang, kung bulagan ka sa imong kapikas ug gusto niyang mobiya tungod Niini. Dili ninyo kinahanglan pugngan sila. Kung gusto nila nga biyaan kamo ug biyaan nila kamo tungod kang Cristo, pasagdi silang mobiya. Pero dili kamo puedeng magminyo pag-usab! “Kondili gitawag kita sa Dios ngadto sa kalinaw.” Kita n’yo? Karon, dili nga kamo mahimong magminyo pag-usab, gipahayag na niya kana, pero dili ninyo kinahanglan magkinabuhi nga kauban ang usa ka dili-matotoo nga bana o usa ka dili-magtotoo nga asawa kung ayaw na nila.

42 Kung gusto pa nila, nga nagaingon “Sige, magsimba ka. Ug kung gusto mo nga moadto didto, bahala ka. Gusto mong moadto sa inyong simbahan, sige lang. Para nako, wala ko nagatoo Niini. Ug ako—buhaton ko ang bisan unsa para lang sa imo, dili ako mobabag kanimo, sige lang,” kung ingon-ana magpabilin ka lang dinha, wala ka mahibalo basin ang imong gibalaan nga kinabuhi pagabalaanon siya nga mamahimong magtotoo, maghinungdan kanila nga motoo. Kita n’yo? Bisan asa man kanila, sa lalaki o sa babaye man, kita n’yo. Kamo. . .

43 Pero karon para lang isulti, “Ako. . . Igsoong Branham, minyo na ko ug ang akong asawa usa man gud ka dili-magtotoo, ug ania ang usa ka igsoong babaye dinhi nga puede kong minyoan. Bulagan ko unta kining usa ug minyoan kanang usa.” Oh, dili! Dili, gayud! Ang imong pagpanumpa niini hangtud na nga ihimulag kamo sa kamatayon, ug wala na’y lain pa sa kalibutan ang makapahanugot sa imo nga magminyo (dinha sa Biblia) hangtud nga ang imong kapikas patay na. Husto kana. Kana lang ang bugtong paagi! Wala gyuy og unsa man nga pagminyo pag-usab bisan asa, gawas kon patay na ang kapikas. Kana lang. Kita n’yo?

44 Dili ninyo mahimong ipasupak Kini sa Kaugalingon Niini. Busa basahon lang ninyo ang mga bersekulo nga nauna ug ang sunod, ug makuha mismo ninyo kung unsa ang ginahisgotan niya. Karon, ang buot ipasabot niini dinhi, dili. . . Tan-awa ninyo:

Ang buot bang ipasabot niini nga ang usa ka igsoong babaye o usa ka igsoong lalaki gawasnon na nga magminyo pag-usab?

45 Dili, sir. Kita n’yo, una niyang gipasabot kana. Tan-awa gani ninyo:

...ako nagasugo sa mga nangaminyo na, dili ako, kondili ang Ginoo, Nga ang asawa dili magbulag gikan sa iyang bana:

Apan ug kung ang asawa mobulag gyud, kinahanglan magapabilin ang asawa nga mag-inusara, kon makig-uli hinoon siya sa iyang bana: . . . (Kita n'yo?)

⁴⁶ Wala gyu'y ingon niana nga ang si kinsa man nga magtotoo magminyo pag-usab, samtang buhi pa ang iyang kapikas.

Karon, ania ang usa pa. Ingon niini ang ikaduha:

170. Unsa mang klase sa lawas ang maangkon sa mga dautan sa katapusang pagkabanhaw didto sa Dakung Paghukom diha sa Maputi nga Trono?

⁴⁷ Pagabangonon ang makasasala diha sa pagkabanhaw aron hukman sa lawas kung asa siya nakabuhat og kasal-anan. Kita n'yo? Kinahanglan niyang moatubang sa Paghukom diha sa pagkabanhaw.

⁴⁸ Ang *pagkabanhaw* dili pagpuli, kini maoy “pagbanhaw sa kung unsa ang nalubong.” Sa dihang nabanhaw si Jesus gikan sa mga patay, Siya'y pareho ra nga lawas sama sa kung unsa ang nalubong, nabanhaw Siya sa mao ra nga matang sa lawas. Mangabanhaw kita diha sa mao ra nga lawas sama sa kung unsa kini paglubong kanato; kini'y usa ka pagkabanhaw, dili pagpuli.

⁴⁹ Karon, gisulti sa Biblia nga ang . . . nga pagahukman kita sumala sa mga kasal-anan nga nabuhat sa lawas. Ug, sa dihang mabanhaw ang mga dautan, siya pagahukman diha sa pareho ra nga lawas kung asa siya nakasala, sa mao ra nga lawas.

171. “Giila ni Adan si Eva nga iyang asawa; ug” (pang-sumpay) “nanamkon siya, ug nanganak kang Cain.” Nagatoo ako sa tanan nga gitudlo mo, pero adunay . . . unta akong . . . Unsaon ba nako pagtubag ang usa ka tawo nga—nga nagsulting wala siya nagsamkon pagkahuman nga giila siya ni Adan, tungod sa pang-sumpay nga “ug.” “Giila ni Adan ang iyang asawa; ug nanamkon siya, ug nanganak kang Cain.”

⁵⁰ Karon, kita nga mga hamtong nakabalo na sa “giila” kung unsa ang buot ipasabot niini. Karon, ang pangutana maoy mahitungod sa pang-sumpay. Karon, kung matikdan n'yo, mga higala, kita n'yo, inyong—dili ninyo mahimong pasultihon ang Biblia og usa ka butang diha sa usa ka bahin ug lahi na pud kini sa lahing bahin. Kinahanglan isulti Niini ang parehong butang sa tanang panahon. Ug kung napasulti ninyo Kini og usa ka butang dinhi ug lahi na pud sa laing bahin dinhi, nan sayup ang interpretasyon n'yo. Kita n'yo? Dili n'yo mahimo kana. Dili ninyo mapahimo si Eva nga gilimbongan sa serpente ug dayon makita siya sa ubang bahin nga gilimbongan pag-usab. Kita n'yo? Ug ang unang higayon nga gilimbongan maoy sa dihang nanamkon

siya. Dili ninyo mamahimo siyang gilimbongan sa makaduhang higayon.

⁵¹ Sige ipakita ko sa inyo ang inyong mga pang-sumpay. Sa pagbasa sa Biblia kinahanglan mahibaloan n'yo kung asa ipahiluna ang mga pang-sumpay. Ginasumpay-sumpay sa *pang-sumpay* ang inyong pagpamulong. Kita n'yo? Karon matikdi ninyo kini. Karon, sa Genesis 1:26, matikdi kining pang-sumpay, ug dayon ipasabot ninyo kini ug dayon sultihan ko kamo kung giunsa niya . . . sa dihang giila ni Adan ang iyang asawa. Genesis, sa unang kapitulo, ug sugod sa ika-26 nga bersekulo. Karon, paminaw gayud og ayoh. Gibuhat na sa Dios ang Iyang mga binuhat niadtong panahona, ug gipatungha sa Dios sa yuta ang mga butang nga nagakamang ug ang tanan nang mga butang nga nanungha sa yuta. Karon, sa ika-26 nga kapitulo . . . sa ika-26 nga bersekulo sa unang kapitulo sa Genesis:

Ug miingon ang Dios, Buhaton nato ang tawo sa ato mismong dagway, ingon sa ato mismong—mismong kasama: . . . ug sila (ang tawo) . . . (dili siya; “sila,” kita n'yo, dinaghan) magabuot sila sa mga isda sa dagat, ug sa mga langgam sa kalangitan, ug sa mga kahayopan, ug sa . . . (Nakita n'yo ang “ug, ug, ug” ginasumpay-sumpay?) . . . ngadto sa yuta, ug sa tanan nga nagakamang nga butang nga nagkamang sa ibabaw sa yuta.

Busa gibuhat sa Dios ang tawo sa iyang kaugalingong dagway, sa dagway sa Dios gilalang niya siya; gilalang niya sila nga lalaki ug babaye (nga lalaki ug babaye).

Ug gipanalanginan sila sa Dios pagkahuman sa Iyang paglalang, dayon, ug . . . miingon ngadto kanila, Sumanay, ug (ug) dumaghan kamo, ug pun-on ninyo ang yuta, ug magagahum kamo niini, . . .

⁵² Sunod-sunod nga pang-sumpay sa kung unsang . . . Kinahanglan nga magpadaghan kono ang tawo. *Ug*, pagkahuman magpadaghan, dayon magagahum sila sa yuta; kana'y hangtud na sa Milenyum. Kita n'yo? Sige, “Magagahum sa yuta.” Sige:

. . . ug magabuot sila sa mga isda sa dagat, ug . . . sa mga langgam sa kalangitan, ug ibabaw sa tanan nga binuhat nga buhi nga nagalihok sa ibabaw sa yuta.

⁵³ Karon, gibuhat sa Dios ang tawo sa Iyang Kaugalingong dagway, gibuhath, sila (ang tawo) magabuot sa tibuok kalibutan, magagahum niini ug sa tanan-tanan, ug buhaton nila kini ug magabuot sila sa mga isda sa . . . ug sa tanan nga gibuhath Niya. Ug dayon mahibaloan nato, sa Genesis 2:7 . . . Paminawa ninyo kini. Human nga gibuhath sa Dios ang yuta, human nga gibuhath na ang tawo, gihatagan ang tawo og pagbulot-an ibabaw sa yuta, human nga gihatag na kaniya ang tanan nga aduna siya,

ug gibuhat sila sa Dios, gisultihan sila nga magpadag-...nga magpadaghan ug pun-on nila ang yuta, ug ang tanan niining mga butang, ug pagkahuman sa pito pa ka mga bersekulo mahitungod sa mga butang nga nahuman Niya, ug sa kalangitan ug yuta ug tanan na, “*Ug* giumol sa Ginoong Dios ang tawo gikan sa abog sa yuta.” “Ug!” Ania Siya (“*ug*” *pang-sumpay*) ginaumol na ang tawo nga Iya nang nabuhat. Kita n’yo? Nga ginaumol na ang tawo:

Ug... (nga ginasumpay-sumpay ang Iyang pagpamulong)... giumol sa Dios ang tawo gikan sa abog sa yuta, ug gihuypan (ang gininhawa) ngadto sa mga buho sa iyang ilong sa gininhawa sa kinabuhi; ug ang tawo nahimong kalag nga may kinabuhi.

⁵⁴ Karon, pamalandonga ninyo kana! Human Niyang gibuhat ang tawo (babaye ug lalaki) diha sa Genesis 1:26 hangtud 28, gibuhat Niya ang tawo sa Iyang Kaugalingong dagway, gibuhat siya ug gihatagan siya... gamhan ang mga gingharian ug gihatag sa iya ang tanan niining mga gahum ug tanan na, ug bisan pa niana wala pa Niya giumol ang tawo.

⁵⁵ Kita n’yo, gilimbongan na ni Satanas si Eva. Siyempre, giila pud siya ni Adan, pero human na siyang gilimbongan. Tungod kay dinhi mismo siya’y... niadtong sila... sa wala pa sila... Niadtong miabot sila sa paghukom, ang ingon Niya... ug gitipon silang duha sa Dios ug miingon, “Kinsa’y nagbuhat niini?” Gipangutana sila niadtong pangutana.

Ang tubag ni Adan, “Ang babaye man gud nga gihatag Mo kanako.”

Ug ang ingon sa babaye, “Gilimbongan ako sa serpente.”

⁵⁶ Ug nagbutang ang Dios og tunglo ngadto kanila, ug ang tanan na nga sama niadtong. Ug *dayon* giila ni Adan ang iyang asawa, nakita n’yo, human nga siya nalimbongan na ug buros na. Sama mismo niadtong gibuhat sa Dios ang tawo dinhi sa Genesis 1:26 ug bisan pa nga wala pa siya naumol. Kita n’yo? Sige.

⁵⁷ Karon bantayi ninyo, mopaubos kita dinhi ug basahon, usab:

Ug gihinganlan ni Adan ang iyang asawa... Eva; tungod kay siya mao ang inahan sa ngatanan nga may kinabuhi nga butang, ngatanan... o inahan sa ngatanan nga may kinabuhi. Gihinganlan ang iyang asawa... gihinganlan ang babaye ingon nga asawa... o babaye tungod kay siya... sa ngatanan nga may kinabuhi.

Ug ang GINOONG nagbuhat alang kang Adan ug sa iyang asawa... mga sinina nga panit aron katabonan sila.

⁵⁸ Bueno, karon matikdi ninyo sa Genesis pag-usab, 1:21, gibuhat sa Dios ang mga balyena sa dagat. Gihimo Niya ang tanan, ug gibuhat ang kabuhatan, gibuhat ang tawo sa Iyang Kaugalingong dagway. Gibuhat ang tawo, dili “usa ka” tawo,

tibuok tawo, tanan sila sa Iyang Kaugalingong dagway. Kita n'yo? Ug sumala sa dagway sa Dios gibuhath Niya sila; lalaki ug babaye, pareho silang gibuhath nga ingon niana.

⁵⁹ Ug karon mahibaloan nato, sa bahin niini pag-usab, pagkahuman Niya nga gibuhath ang tawo sa Iyang Kaugalingong dagway, pagkahuman Niya nga gibuhath siya dinhi nga lalaki ug babaye, dinhi giuomol Niya ang tawo gikan sa abog sa yuta.

⁶⁰ Ug dayon, human Niyang gibuhath kadto, human Niyang gihimo siya nga lalaki ug babaye, dayon mibalik Siya dinhi ug naghimo og usa ka babaye para sa lalaki, human nga Iya na siyang naumol. Kita n'yo?

⁶¹ Kita n'yo, ginapangsumpay-sumpay sa inyong pang-sumpay kana nga pagpamulong. Sama na lamang sa gisulti niini, karon, *dinhi*, "Gibuhath sa Dios ang tawo sa Iyang Kaugalingong dagway, sama sa Iyang dagway gibuhath Niya siya," ang Dios kini nga namulong diha sa Iyang mga hunahuna, sa Iyang hunahuna, kung unsa ang aduna Siya. *Dinhi* pud Niya gibuhath ang mismong buhat.

⁶² Si Jesus mao ang Cordero nga gipatay sukad pa sa pagkatukod sa kalibutan; dili nga gipatay Siya upat ka libo ka tuig pagkahuman pa niadto. Kita n'yo?

⁶³ Busa gilimbongan sa serpente si Eva. Tinuod kana. Dayon pagkahuman na sa maong paghukom, ayha na giila ni Adan ang iyang asawa. Ug dayon nagsamkon si Eva ug nanganak og usa ka anak nga lalaki, si Cain. Nasabtan ba ninyo? Kita n'yo, gipadayon lang niadtong pang-sumpay ang gibuhath ni Adan, dili kung unsay gibuhath sa wala pa si Adan.

⁶⁴ Ug tan-awa ninyo dinhi, kung gusto ninyong sundan kana, mismo sa maanindot nga pamahayag dinhi, nagatoo ko nga makita nato kini dinhi sa . . . ug dinhi sa ika-4 nga kapitulo, sa pagtoo ko.

Ug giila ni Adan . . . ang iyang asawa; ug nagsamkon siya, ug nanganak kang Cain, ug (usa ka pang-sumpay) miingon, nakabaton ako og usa ka lalaki tungod sa panabang sa GINOO.

⁶⁵ Kung ingon niana man dili kadto si Adan, anak diay kadto sa Dios pinaagi niini. Kita n'yo? Kita n'yo? Kung buot ninyong ibutang ang inyong pang-sumpay kung asa, nakita n'yo ("ug" na usab), "nakabaton ako og usa ka anak nga lalaki gikan sa Dios." Kung ingon niana ang Dios kono ang naghatag kaniya sa maong lahi kaayong linalang nga gitawag nga Cain. Asa man diay naggikan ang tanang pagkadautan ug kangil-aran ug ingon-anang mga butang nga anaa kang Cain, nagagikan ba diay kadto sa Dios? Dili puede! Kita n'yo? Nalimbongan gyud si Eva sa serpente, ug ang serpente . . . busa si Eva nagsamkon na niadtong panahona. Dayon giila siya ni Adan, siguradong giila

gyud niya, milakaw siya ug nagpuyo uban si Eva ingon nga iyang asawa, pero nagsamkon na siya sa niining bata.

⁶⁶ Ug dayon sa diha nga natawo na ang anak mismo ni Adan, siya'y malomo, makalilipay, mapainubsanon, maaghup nga bata sama kang Adan.

⁶⁷ Pero kining bataa, asa diay nagagikan kanang dayagang pagpamakak, asa man nagagikan kana nga sala? Asa diay gikan kining lalakiha, si Cain, kanang mamumuno? Ug gisulti sa Biblia nga "Ang yawa usa ka mamumuno." Asa man nagagikan kanang pagpamakak? (Ang yawa maoy amahan sa bakak; usa siya ka bakakon ug ang amahan sa bakak.) Siguradong nagagikan gyud kini nga gawas sa Dios. Busa si Cain dautan, ug si Satanas ang iyang amahan; ug sa iya gikan kining dautan nga bata.

Ug dayon, siyempre, giila ni Adan ang iyang asawa, sigurado.

⁶⁸ Ug, oo, siguro kung ingon niini ang pagkasulti mo. Puede kong isulti, pananglitan ako mismo, bueno, karon, natawo si Rebekah, ug human sa pipila ka panahon miabot. . .

⁶⁹ Ginabasa ko kaniadto usa niana ka adlaw ang istorya mahitungod ni Joseph, ug nalipay gyud ako sa istorya bahin kang Joseph. Misulod ako didto sa gamay'ng lawak ug miluhod, didto kini sa Minneapolis, ug miingon ko, "Ginoong Dios, daku ang akong pagpasalamat Kanimo tungod sa usa ka tawo nga sama ni Joseph!" Ug nahunahuna ko, "Kung ako lang unta. . . Gihinganlan ko unta si Billy Paul nga, 'Joseph,' gipangalan ko unta siya nianang halangdong tawo." Wala ni usa ka lama batok kaniya bisan asa sa Biblia, hingpit gyud nga tipo ni Cristo sa matag anggulo. Nahunahuna ko, "Gustong-gusto ko kana unta. . ." Miingon ko, "Oh, kung magkaaduna lang ko og anak nga lalaki, paganganlan ko gyud siyang 'Joseph.'"

⁷⁰ Ug diha-diha dayon miabot kadtong Kahayag sulod sa bilding ug miingon, "Makabatona ka'g usa ka anak nga lalaki ug hinganlan mo siyang 'Joseph.'"

⁷¹ Giila ko ang akong asawa, oo, nanganak siya kang Sarah. Dayon giila ko ang akong asawa *ug* nanganak siya kang Joseph. Nakita n'yo ang buot kong ipasabot? Kita n'yo, wala kini labut sa nauna. Ang saad sa Dios maoy "Joseph," napatung-an lang niadto si Sarah. Dili sa ginabutang ko sa dili-maayo nga situwasyon si Sarah, kondili para ipakita lang sa inyo kung unsa ang akong—kung unsa ang buot kong ipasabot. Kita n'yo, nga. . . si Sarah gihatag sa Dios, usab. Ug busa nasayod kita niana.

⁷² Karon, pero, kita n'yo. Ang Dios, sa dihang gipahamtang Niya ang paghukom kanila ni Adan ug Eva, nabuhat na ni Eva ang kasal-anan sa wala pa Niya mapahamtang ang paghukom. Ug, paminaw, kabalo ba mo nga ang unang bata nga sukad natawo sa kalibutan "natawo diha sa sala, giumol diha sa kadautan, mianhi sa kalibutan nga nagapanulti'g bakak"? Ang

pinaka unang natawo sukad-sukad sa ingon niana nga paagi, tungod kay . . .

⁷³ Ingon ninyo, “Unsa man diay si Adan ug Eva?” Wala man sila gipakatawo. Gilalang sila. Kita n’yo?

⁷⁴ Pero ang pinaka unang bata nga miabot natawo mismo sa sala, busa mamaingon niana usab ang tanan nga mosunod niini. “Ang tawo nga natawo sa usa ka babaye adunay ng hamubo nga mga adlaw ug tugob sa kasamok.” Natawo man siya sa kasalanan. Mao kana ang hinungdan nga kinahanglan siya matawo pag-usab, kita n’yo, pinaagi sa Espiritu; dili pinaagi sa usa ka espirituhanong *panghunahuna*; pinaagi sa espirituhanong Pagkahimugso, nakita n’yo, nga ginabag-o siya, ginahimo siyang usa ka bag-ong linalang. Ang unang tawo nga gipakatawo natawo diha sa sala.

⁷⁵ Dayon, kinahanglan nga adunay Usa nga ipakatawo nga dili pinaagi sa pakighilawas. Karon, kung ang sekso dili maoy unang butang, nan nganong kinahanglan sa tawo nga magkaaduna og Usa diha sa sekso aron matubos ang tibuok kaliwatan sa tawo? Nganong dili na lang Niya ipakanaug ang usa sa mga pasilyo ug moingon, “Ania ang Usa nga matarung nga *nagahunahuna* og husto”? Gikinahanglan nga moabot kini pinaagi sa sekso, moabot pinaagi sa babaye, tungod kay didto kini nagsugod sa una pa lang. Pinaagi sa sekso, nagresulta og dili-pagkamatarung; ug pinaagi sa sekso, nagresulta og Pagkamatarung. Kita n’yo? Ang Dios, nga walay pagpanapaw, nga walay unodnon nga pangibog, nagpahimugso kang Jesus Cristo nga dili pinaagi sa pagpakighilawas, kondili pinaagi sa paglandong kang Maria ug paglalang niining Bata sa sulod niya; nga miabot pinaagi sa sekso. Ug, pinaagi niadto, giluwat sa Iyang Balaang Dugo ang tibuok kaliwatan nga nahulog. Kita n’yo? Busa kinahanglan ingon niana gayud, wala na’y ubang paagi para niini.

⁷⁶ Ang matag tawo nga natawo sa usa ka babaye paingon gyud ngadto sa kamatayon, patay na siya sa dihang gihimugso pa lang siya. Husto kana.

⁷⁷ Kana ang hinungdan kung nganong gisulti nako niadtong miaging adlaw kung unsa nga naangkong na nato kanang mapanalanginong assurance.

⁷⁸ Sa dihang ang Israel kaniadto . . . Dili ba . . . Nakasulti ako og daghang mga butang nga wala pud og kalabutan, pero usahay ang Ginoo nagahatag kanako og butang nga nagapaukyab kanako. Mao nga paghatag Niya niana kanako, nagpaukyab kini sa ako nga mas labaw pa kay sa nasinati ko sulod sa daghan nang mga tuig. Sa dihang gihatag Niya sa ako kana niadtong miaging adlaw, sa dihang nakita ko ang Israel, nga usa ka ulipon, walay puloy-anan, mga anak sa Dios. Ginalabayan lang kaniadto og giagup-op na nga mga tinapay, bisan unsa na lang nga gustong

ilabay kanila! Oh, kung mahimo lamang nga magkaaduna sila og usa ka puloy-anan kon diin nga makapuyo sila nga malinawon, manginabuhi pinaagi sa singot sa ilang agtang!

⁷⁹ Ug, usa ka adlaw, adunay miabot nga usa ka propeta gikan sa kamingawan, nga gipangulohan sa usa ka Haligi nga Kalayo, ug gisulti sa ila ang mahitungod sa usa ka yutang saad. Wala pa'y nakaadto didto, wala sila'y hibangkaagan bahin niadto. Pero usa kadto ka saad. Gitooan nila kadto ug misunod sa niining propeta hangtud nga nakaabot sila duol sa yutang saad.

⁸⁰ Dayon adunay usa ka saksi nga ang ginganlan og *Josue*, nga ang buot ipasabot “Jehovah-nga-manluluwas,” mitabok siya sa Jordan padulong niadtong yuta, ug mibalik nga dala ang ebidensya nga ang maong yuta eksaktong mao gyud sa kung unsay gisulti sa propeta sumala sa Pulong sa Dios. Aduna sila'y dalang pinungpong sa mga ubas, nga kinahanglan pa og duha ka tawo para pas-anon kadto, ug aron matilawan nila ang orihinal nga bunga gikan mismo niadtong yuta. Walay nakahibalo nga atua didto ang maong yuta, gitooan lang nila kadto. Nanglakaw sila paingon didto tungod sa pagtoo ug gitooan nila kadto.

⁸¹ Karon sa dihang napanunod nila ang ilang yuta, malipayon kaayo sila! Mahimo na nga magpuyo ang matag usa nga malinawon, magkaaduna na sila og kaugalingong gamay'ng tanaman, magkaaduna na og kaugalingong mga anak ug tanan na. Pero, bisan pa niana, miabot siya sa katapusan tungod sa katigulangan, ug nabitik siya sa kamatayon ug gikuha siya.

⁸² Dayon gikan sa mga pasilyo sa Langit, pinaagi sa usa ka babaye, miabot ang usa pa ka halangdon nga Manggugubat, ang pinakalabing halangdon nilang tanan, ang Dios Mismo nga napadayag diha sa unod, si Jesus Cristo. Ug gisulti Niya sa Israel kung unsa nga sila dugay nang usa ka halangdon nga katawhan, pero nag-atubang sila sa kamatayon, ingon Niya, “Pero isulti Ko sa inyo ang mahitungod sa usa pa ka yuta. Sa Balay sa Akong Amahan adunay daghang puloy-anan. Kon kini dili pa ingon niana gisulti Ko unta sa inyo. Malipayon kamo sa inyong yuta, aduna kamo'y mga puloy-anan, aduna kamo'y mga anak. Pero ginalubong ninyo ang matag usa kanila didto ug mora'g katapusan na kana.”

⁸³ Nakita kini ni Job, miingon, “Kung mamatay ang usa ka kahoy, mabuhi kini pag-usab. Pero ang tawo nagakapukan ug nagakabugtoan og ginhawa, hain na man siya? Ginapasidunggan siya sa iyang mga anak ug wala niya kini mahibaloi. Oh, itago Mo unta ako sa sheol, ibutang ako sa tago nga dapit hangtud nga mahupay ang imong kaligutgut!” Miingon siya, “Apan kung ang tawo mamatay, mabuhi ba siya pag-usab?”

⁸⁴ Upat ka libo ka tuig sa wala pa kana, aduna sila'y gipangita sa luyo nianang lubnganan. Ang tanang maayong mga butang gihatag sa Dios kanila, usa ka puloy-anan, usa ka pamilya ug

mga anak, ug usa ka iglesia, ug tanan na, ug mga propeta, ug halangdong mga lalaki hangtud niadtong panahona, pero bisan pa niana ang matag usa nangamatay ug gipanglubong. Pero ania ang Usa ug nagaingon, “Sa Balay sa Akong Amahan adunay daghang puloy-anan, ug moadto Ako ug aron sa pag-andam og luna alang kaninyo.” Sama ni Josue, miabot Siya sa Iyang Kadesh-barnea.

⁸⁵ Sa dihang miabot ang Israel didto sa Kadesh-barnea. . . Ug ang Kadesh kaniadto mao ang lingkuranan sa paghukom sa kalibutan niadtong panahona, pito ka tubod gikan sa usa ka dakung pinakapunoan nga tubod, ang buot ipasabot paghukom, sama sa Balay sa Dios ug ang mga Iglesia nga nagagikan Niini. Ug si Josue, gikan sa Kadesh-barnea, mitabok padulong sa yutang saad aron dalhon pabalik ang ebidensya.

⁸⁶ Karon, miabot usab si Jesus sa Iyang *Kadesh*. Unsa man kadto? Lingkuranan sa paghukom! Asa man kadto? Didto sa Kalbaryo, kon diin gihukman Siya sa Dios tungod sa mga sala sa kalibutan. Unsay gibuhat nila? Natagbo Niya ang kamatayon, ang bayad sa Dios. Aron ipasig-uli ang mga makasasala ngadto sa Dios, namatay Siya sa maong kamatayon ug mitabok sa suba sa Jordan (nga maoy kamatayon). Gilubong nila Siya.

⁸⁷ Namatay Siya hangtud nga ang bulan ug mga bitoon naulaw sa ilang mga kaugalingon. Namatay Siya hangtud nga ang yuta nangurog sa nerbiyos. Nag-uyog kini hangtud nga ang mga bato nangaligid gikan sa mga bukid. Nag-uyog kini hangtud nga dili na magdan-ag ang mga bitoon, dili na magdan-ag ang bulan, ug misalop ang adlaw sa tunga-tunga sa adlaw. Namatay Siya! Patay gyud hangtud nga adunay usa ka Romano ang mikuha sa napulo-ka-librang bangkaw ug gidughang kini’g ayo ngadto sa Iyang kasingkasing; migawas ang tubig ug Dugo. Patay na Siya! Gitabok Niya ang Jordan. Ug gibutang nila Siya sa lubnganan ug giligid ang usa—usa ka bato sa pagtabon niini, nga nagkinahanglan og usa ka gatus ka mga tawo aron paligiron kadto. Patay na Siya! Gibutangan nila kadto og usa ka Romanhong selyo.

⁸⁸ Apan niadtong buntag sa Pasko sa Pagkabanhaw mibalik Siya gikan sa pikas Jordan, ug miingon, “Ako mao Siya nga namatay; ug nabuhi pag-usab hangtud sa kahangturan!”

Ang uban kanila miingon, “Usa ka espiritu ang makita namo.”

⁸⁹ Miingon, “Hikapa ninyo ako. Aduna ba’y unod ug bukog ang usa ka espiritu?” Miingon, “Aduna ba kamo’y makaon? Dalhi ninyo Ako og makaon.” Ug gihatagan nila Siya og isda ug tinapay. Ug gikaon Niya kadto. Usa Siya ka Tawo!

⁹⁰ Unsa man Siya? Nagadala pabalik og ebidensya nga adunay usa ka Yuta nga atong pagaadtoan. Unsa ma’y gibuhat Niya? Siya, sama ni Josue, nagdala Siya og ebidensya

mahitungod Niini. Ang ingon Niya, “Karon, kung gusto ninyo og ebidensya Niini, ‘Maghinulsol kamo, ang matag usa kaninyo, ug managpabautismo sa Ngalan ni Jesus Cristo para sa kapasayloan sa inyong mga sala, ug inyong madawat ang Espiritu Santo.’ Kana ang ebidensya nga nagbanhaw Kanako. Ihatag Ko kaninyo ang Patinga sa inyong panulondon.” Ug dayon unsay nahitabo? Sa Adlaw sa Pentecostes miabot ang Espiritu Santo sa magtotoo.

⁹¹ Karon unsa ma’y buhaton nato? Isugid nato ang atong mga sala, isipon nga patay na ang atong mga kaugalingon, nga gilubong na kauban Siya diha sa bautismo, nabanhaw na kauban Siya sa Iyang pagkabanhaw. Para sa unsa? “Magalingkod sa Langitnong mga dapit kauban Niya.” Dinha kung asa kita karong gabhiona, nagalingkod (dili sa pisikal) sa espirituwal, nga ang atong mga hunahuna, ang atong mga panghunahuna, ang atong mga kalag halayo sa mga kabalaka sa kalibutan karon. Unsa man kita? “Anaa na sa Langitnong mga dapit *kang* Cristo Jesus.” Unsaon man nato sa pagsulod Niini? “Pinaagi sa usa ra ka Espiritu,” Unang Mga Taga-Corinto, ika-12 nga kapitulo, “pinaagi sa usa ka Espiritu kitang tanan gibautismohan pinaagi sa Espiritu Santo ngadto sa usa ra ka Lawas sa mga magtotoo.” Ang mistikal nga Gingharian sa Dios!

⁹² Dinha milingi kita ug nakita kon diin nga kita kaniadto nagapamakak pa ug nagapangawat ug nagapanglimbong ug nagapanigarilyo ug nagabuhat sa mga butang nga sayup. Nabanhaw na kita gikan niana. Anaa na kita sa Langitnong mga dapit. Unsa man kini? Ang ebidensya nga sa umalabot nga adlaw magkaaduna kita og lawas nga sama sa Iyang Kaugalingong mahimayaong lawas. Kini ang eksaktong ebidensya sa pagkabanhaw, tungod kay, sa potensiyal, nabanhaw na kita kauban Niya, nga sa potensiyal namatay na kita.

⁹³ Si William Branham nga nagkinabuhi kaniadto wala na nagkinabuhi pa, patay na siya sa kapin kon kulang traynta ka tuig, karon usa na siya ka bag-ong binuhat. Si Orman Neville nga nagkinabuhi kaniadto wala na nagkinabuhi pa, patay na siya sa daghang tuig sa wala pa kadto, kini usa na ka bag-ong binuhat. Patay na si Orman Neville, ang—ang magpupusta sa mga lumba sa kabayo, ang sugarol, o unsa man siya kaniadto, kana nga tawo nga nagkinabuhi kaniadto patay na. Wala ko kabalo, dili pud siguro ingon niana si Igsoong Neville kaniadto; pero kung unsa man siya kaniadto, sad-an siya sa tanan niadto, “Ang nakalapas sa labing diyutay nakalapas sa tanan niini.” Kung unsa ka man kaniadto, ikaw usa ka makasasala, ingon niana kamo.

⁹⁴ Ug patay kamo tungod nga gihigugma ninyo ang mga butang sa kalibutan. Ug hangtud nga gihigugma gihapon ninyo ang kalibutan, bisan unsa pa ninyo pagsugid nga *ania* na kamo sa ibabaw, siguradong wala pa kamo dinhi sa ibabaw, *atua* pa kamo gihapon sa ubos. “Siya nga nahigugma sa kalibutan o sa

mga butang nga iya sa kalibutan, ang gugma sa Dios wala gyud nakasulod kaniya.”

⁹⁵ Pero sa dihang mipaibabaw na kamo lagpas niana nga paingon ngadto sa Langitnong mga butang nan natumong na ang inyong mga pagbati ngadto sa mga butang nga atua sa itaas, tungod kay nabanhaw na kamo kauban ni Cristo ug karon nanaglingkod nga magkauban diha sa Langitnong mga dapit. Makasigurado kamo, walay unsa man nga makapasakit sa inyo, wala ni usa ka butang. Bisan ang kamatayon mismo walay . . . wala gyu’y mahimo og unsa man sa inyo. Nakaangkla na kamo diha kang Cristo. Ang kasiguradohan, ang Patinga, nahatud na ang unang bayad, gidawat n’yo na Kini. Unsa’y inyong gibuhat? Mibangon na kauban Niya sa pagkabanhaw.

⁹⁶ Milantaw ako balik sa kung asa ako kaniadto. Karon ania na ako sa ibabaw niana. Ngano man? Pinaagi sa Iyang grasya gibayaw Niya ako pataas, ug ania ako karon nagalingkod sa Langitnong mga dapit diha kang Cristo. Oh, my! Mao gyud kana. Dayon nahimong usa na ka bag-ong Libro ang Biblia. Dayon ginabasa na ninyo Kini pinaagi sa espirituwal nga mga mata ug espirituwal nga pagsabot. Dayon makita na ninyo ang mga kangalan ug mga puli-ngalan, ug dayon makita na ninyo ang mga tagboanan . . . ug mga pang-sumpay, ang buot kong ipasabot, ug uban pa, diha sa Biblia.

⁹⁷ Oh, kon diin nagasulti Kini . . . Moingon sila, “Ginasupak man Niini ang Kaugalingon Niini”; *ania* gihapon ka nga nagabasa. Pagmoanhi ka *dinhi* ug basahon Kini, lahi na gyud Kini. Nakita n’yo? Husto kana. Sigurado. Siguradong, hingpit nga bag-o na ang kahulogan Niini sa dihang basahon mo Kini diha sa Espiritu. Oo.

Kining usa pa nga pangutana dili gyud usa ka pangutana, ang sulti lang niini:

172. Nagkinabuhi ako sa sala sulod sa daghang mga tuig hangtud nga natagbo ko ang Ginoo. Manghangyo unta ko, Igsoong Branham, nakasala ako pag-usab ug dili gyud ako takus nga moduol sa imong atubangan sa niining balaang dapit. Palihog isulti mo sa ako kung mahimo ba akong bug-os nga mapasig-uli pag-usab. Palihog tabangi ako, Igsoong Branham, adunay yawa sa sulod ko. Tabangi ako! Mahimo bang ipandong mo ang imong mga kamot ngari kanako ug ipasig-uli ako pag-usab?

⁹⁸ Karon, aduna diay usa ka pangutana, wala ko kini namatikdi sa dihang gibasa ko kini kaganina. Adunay usa ka pangutana. Karon, kung ang maong tawo ania karon . . . Tugoting basahon ko kini para sa imo:

Nagkinabuhi ako—nagkinabuhi ako sa sala sulod sa daghang mga tuig hangtud nga natagbo ko ang Ginoo. Manghangyo unta ko, Igsoong Branham . . . (Kita n’yo?) . . .

nakasala ako pag-usab ug dili gyud ako takus nga moduol sa imong atubangan sa niini balaang dapit. Palihog isulti mo sa ako kung mahimo ba akong bug-os mapasig-uli pag-usab.

⁹⁹ Oo! Wala ka nakasala, akong higala, nga ingon na ka halayo sa Dios nga dili ka na mapasig-uli. Kung nakasala ka nga ingon na ka grabe nga dili ka na mapasig-uli, dili mo na unta *gustohon* pa nga mapasig-uli. Kita n'yo? Kita n'yo? Apan samtang aduna pa'y usa ka Butang nga nagapakigharong sa imong kasingkasing, mahimo ka pang ipasig-uli.

¹⁰⁰ “Ang nakalapas sa labing diyutay nakalapas sa tanan niini.” Daghang higayon nga ako nakasala, ang matag usa kanato adlaw-adlaw nagabuhat og mga butang nga dili nato gustong buhaton.

¹⁰¹ Anaa kini sa atong kasingkasing. . . Dili mo gyud gusto nga mamahimong ingon niana o wala mo unta gipangutana kini nga pangutana. Kita n'yo? Kana mismo usa ka kapanghimatuoran nga ang Dios nagapakighilambigit pa gihapon kanimo. Siguro ginerbiyos ka, mahimong ginasulti ni Satanas sa imo nga dili ka na puedeng mapasig-uli. Namakak siya, sigurado gyud, namakak siya. Tungod kay, tan-awa, kung adunay kahiladman, nga nagapanawag, kinahanglan aduna gyu'y Kahiladman nga motubag sa maong pagtawag. Kung adunay kagutom para sa usa ka Butang, kana nga Butang siguradong atua gayud sa kung asa man o wala unta ka'y pagkagutom para Niini. Kita n'yo?

¹⁰² Sama sa gisulti ko na sa daghang higayon. Sa dili pa magkaaduna og silik ang usa ka isda sa likod niya, kinahanglan nga aduna una og tubig nga iyang pagalangoyan o wala unta siya'y silik. Sa dili pa magkaaduna og kahoy nga motubo sa yuta, kinahanglan nga aduna una og yuta sa dili pa magkaaduna og kahoy, tungod kay gikinahanglan mauna ang yuta para tuboan sa kahoy.

¹⁰³ Karon, sa dili pa magkaaduna og kabuhatan, kinahanglan aduna una og usa ka Magbubuhat nga mao'y mobuhat sa kabuhatan. Nakita ba ninyo abng buot kong ipasabot? Bueno, hangtud nga nanginahanglan ka ug gigutom nga makabalik ngadto sa Dios, aduna gyu'y Dios sa kung asa man nga nagapanawag kanimo, kita n'yo, o wala unta ka gigutom. Aduna gyud og Magbubuhat!

¹⁰⁴ Karon, kung imong. . . Adunay dapit nga pagnatabok mo dili ka na pueding makabalik pa, pero kung nahulog ka lang balik sa kung unsa ka kaniadto. Ginapakita niini nga *nahulog* ka lang gikan sa grasya. Ang pag-backslide dili nga *nalaglag*. Gusto kong isulti ninyo sa ako kung asa *nalaglag* ang pag-backslide, ug pamatud-i kini sa Biblia. Ang backslider wala man nalaglag, migawas lang siya sa pagpakig-felloship.

¹⁰⁵ Nag-backslide kaniadto ang Israel pero wala gyud nawala kanila ang pakigsaad, nawala nila ang ilang—ilang mga pagdayeg ug kalipay.

¹⁰⁶ Nawala kang David ang kalipay sa iyang kaluwasan sa dihang giangkong niya si Batseba, nga asawa ni Uria, pero wala nawala sa iya ang iyang kaluwasan. Wala gayud siya miingon “iuli kanako ang akong kaluwasan,” ang ingon, “Iuli kanako ang *kalipay* sa akong kaluwasan.”

¹⁰⁷ Oh, daghan kaayong legalismo nga ingon niini sa panahon karon, ang “dili ka magkupot, ni magtilaw.” Wala man ninyo ginabuhat ang mga butang ilalum sa pagkalegalismo.

¹⁰⁸ Wala ako mianhi niining simbahan karong gabhiona tungod sa pagkalegalismo. Nagbati ako og kakapoy, ako—ako—ginerbiyos ako, nabalaka ako, naglibog ako mahitungod sa butang nga anaa sa akong atubangan, giduslitan ang akong kasingkasing, hangtud nga paspas nga nagapitik ang akong kasingkasing. Gipamikugan ako, sakit ang lawas, sa karon mismong higayona, nga pabalik-balik, pataas-paubos *dinhing* bahina. Nagakaluya, ginanerbiyos, nagapangurog; kinahanglan pang manggunit *dinhi* ug mangapyot; piot ang mga tudlo ko sa tiil sa akong sapatos. Sagol-sagol ang gibati ko pero mianhi ako sa gihapon. Nganong mianhi man ko, sa gihapon? Tungod kay gihigugma ko man ang Dios. Buhi man o mamatay, kinahanglan kong mobarug dinhi para Kaniya. Dili tungod nga kinahanglan ko. Dili Niya igsapayan kung moanhi man ako o dili. Akong. . . Kung mamatay ako pa-Langit man ako, sa gihapon. Pero mianhi ako tungod kay gihigugma ko man Siya. Nangalagad kamo sa Dios tungod kay gihigugma man ninyo Siya, dili tungod nga kinahanglan n’yong buhaton kini. Tungod kini sa igong gugma ninyo ngadto Kaniya!

¹⁰⁹ Dili sa matinud-anon ako sa akong asawa tungod kay nahadlok akong idiborsiyo niya ako. Matinud-anon ako kaniya tungod kay gihigugma ko man siya. Wala na’y lain pa nga babaye sa kalibutan gawas kaniya. Kana ang hinungdan kon nganong matinud-anon ako kaniya. Dili tungod kay. . . Kung nakabuhat ako og sayup ug sa hunahuna sa mga tawo nakabuhat ako og sayup, moduol ako kaniya, moingon, “Meda, langga, wala man nako gituyo nga buhaton kadto.” Pasayloon niya ako niini, kabalo ko nga pasayloon gyud niya ako. Pasayloon ko pud siya; gihigugma ko man siya. Pero akong—pasayloon ko gyud siya; pasayloon pud niya ako. Pero dili ko gyud buhaton kana sa unsa mang hinungdan, gihigugma nako siya og maayo nga dili ko mahimo kana. Dili tungod nga sa hunahuna ko basin dili niya ako pasayloon, kondili tungod sa ideya nga gihigugma nako siya og maayo mao nga dili ko mahimo kana sa una pa lang. Ug hangtud nga ingon niana ang paghigugma nako sa iya, dili ko gayud buhaton kana; ug kung gihigugma pud niya ako sa paagi nga angay niyang buhaton, dili pud niya buhaton kana.

¹¹⁰ Ug gihigugma ninyo ang Ginoo uban sa tibuok ninyong kasingkasing, dili na ninyo kinahanglan pang mabalaka mahitungod niining mga butanga. Kung masayup kamo, wala man ninyo gituyo nga makasala, basta nga nabuhat lang ninyo ang usa ka butang nga sayup. Kita n'yo, nadalin-as lang kamo. Tinuod, ania kamo sa niining pagpakig-fellowship, dayon nadalin-as lang kamo ngadto niining mahugaw'ng kahimtang pag-usab.

¹¹¹ Pero unsa man kini? Kini sama ra sa usa—usa ka agila. Usa niana ka higayon nakita nako . . . dinhi sa Cincinnati Zoo, giuban nako si Sarah ug gisuroy siya didto. Kung aduna man akong nakita nga nakapasakit gyud kanako, mao ang makakita og usa ka gihawla.

¹¹² Dili gyud ko makaagwanta nga makakita og unsa man nga gihawla, bisan ang gagmay'ng mga langgam. Ug kabalo ko nga kamong mga kababayen-an adunay gagmay'ng mga langgam, pangbuhii ninyo sila.

¹¹³ Niadtong bata pa ako kanunay ko na nga ginaingon, “Pag magkaaduna na ako og kahigayonan, kung modaku na ako, mosulod ako sa matag balay ug pangbuhian ko silang makaloolooy'ng gagmay'ng mga langgam.” Oo, sir. Ingon ko . . . Atua ang langgam napailalum sa init sa adlaw, ug sila nagasige'g “Hah, hah, hah,” ug ang babaye didto sa likod nga balkonahe nagapanigarilyo, ug kadtong makaloolooy'ng langgam atua mismo nabulad sa initan. Wala gyu'y mahimo ang langgam, nagtugdon na lang siya didto. Ug wala siya gipanganak para niana! Nahunahuna ko, “Grabe, kung makasulod lang unta ako didto ug buhian siya, dili na gyud siya magdugay didto.” Kita n'yo?

¹¹⁴ Dili ko ganahan nga makakita og bisan unsa nga gihawla. Dili ko ganahan nga makakita og tawo nga ginatawag ang iyang kaugalingon nga *Cristohanon* pero gihawla sa kung unsang matang sa kredo sa simbahan, “Dili ako makasulti og, ‘Amen.’ Ako—dili ko mahimong tohan *Kana*. Ang sulti man gud sa pastor, ‘Ayaw pagtoo Niana.’” Oh, intawon, grabe! Gipakatawo kamo nga gawasnon.

¹¹⁵ Dayon unsa pa kaha ang usa ka dakung agila? Siya'y usa ka langitnong langgam. Kanunay siya'y atua didto ibabaw sa mga panganod. Didto siya nagaadto kada buntag. Sa habog kaayo, nga wala na'y makasunod kaniya! Wala na'y uban pa nga langgam . . . mabungkag gayud ang ubang langgam diha sa kahanginan kung mosulay kini sa pagsunod kaniya didto. Usa siya ka langgam nga espesyal ang pagkabuhat.

¹¹⁶ Ug dayon adunay nakadakop kaniya gamit ang usa ka lit-ag nga hinimo-sa-tawo, nadakpan sa tawo kining dakung agila ug gisulod siya niining hawla. Ug ang looy'ng langgam . . . Gilantaw ko siya ug daw sa gisunog ang akong kasingkasing. Naglantaw

siya sa kilid didto nga ingon *niana* ug wala siya kahibalo kung unsaon paggawas sa maong hawla. Mobalhin siya didto sa pikas, ug siya—kabalo siya nga kinahanglan niyang molupad, ug sugdan niyang ikapakapa ang iyang mga pako. Ug paglupad niya, mabangga niya ang iyang ulo sa mga rehas ug mangaibot na lang ang mga balhibo sa iyang bukton, mga balhibo sa pako, ug bisan sa tibuok niyang ulo, hangtud nga manggidugo kini. Banggaon niya sa makusog kadtong rehas hangtud nga mahagbong siya nga diretso una ang likod niya. Ug mahagba siya didto ug patuyokon ang gikapoy niyang mga mata, mohangad sa langit, “Taga-didto man gud ko. Didto ang akong pinuy-anan. Para didto man ako natawo. Pero, tan-awa n’yo, tali kanako ug didto nagbabag man ang usa ka hawla. Bueno, ang nahibaloan ko lang, isentro ko ang akong hunahuna niini ug ania palupad na ako,” dayon “bang,” ug buhaton niya kini pag-usab.

¹¹⁷ Sa hunahuna ko, “Oh, grabe, makalilisang kana! Ibaligya na lang unta nila kana sa ako. Akong iprenda ang akong Ford aron lang mapalit siya, nakita n’yo, sa tuyo nga mabuhian lang siya.” Kita n’yo? Oh, nagpaguol gyud kadto kanako, kadtong makaloolooy nga langgam didto, nagakapakapa hangtud mangaibot na lang ang mga balhibo. . . Sa hunahuna ko, “Kana na ang pinakamangil-ad nga talan-awon nga nakita ko sukad.”

¹¹⁸ Dili, bakwion ko kini, ang pinakamangil-ad diay nga talan-awon nga nakita ko sukad mao ang usa ka tawo nga gipakatawo aron mahimong anak sa Dios ug dayon gihawla lang sa kung unsang kredo. Ug paghangad niya didto sa itaas ug makita niya ang usa ka Dios nga gusto gyud unta niyang alagaran, pero dili niya mahimong alagaran. Dili nila siya mapahanugotan nga buhaton kana, nakita n’yo, nakahawla na siya. Makalilisang kana nga butang.

¹¹⁹ Oo, oo, igsoong babaye, igsoong lalaki, kung kinsa man ang nagsulat niini, kung nahulog ka man *dinhi* dili buot ipasabot nga nawala ka na. Ikaw usa lamang ka agila nga nahawla, kana lang. Nahawla ka lang dinhi pag-usab sa sala. Dili mo gusto nga magpabilin dinha, kana ang hinungdan kon nganong nagahangad ka. Mao kana, “Oh, Igsoong Branham, didto man ako nagpuyo kaniadto, aduna ba’y dalan dinhi paingon didto?” Oo.

¹²⁰ Nagpahinudom kini kanako usa niana ka adlaw (oh, usa pa ako ka gamay’ng bata kaniadto) naglakaw ako niadto luyo sa umahan, ug aduna niadto. . . may naghigot og usa ka uwak aron ipahilayo kini sa mais. Ug maong makaloolooy’ng langgam halos mamatay na sa gutom. Dili gyud ako mamahimong ingon niana ka mapintas para buhaton kana. Gihigtan kadtong uwak sa tiil, ug nakaon na sa maong langgam ang tanan nga atua sa palibot niya, wala na siya’y makaon pang uban. Gibiyaan na siya niadtong mag-uuma. Ug makaloolooy gyud kadtong uwak—dili na man gani siya makabangon pa. Iya na lang. . . Ug nagalupad

ang ubang mga uwak ug nagapanawag, “Caw, caw, caw.” Sa ubang pagkasulti, nagaingon, “Ari ka na, Johnny Crow! Moabot na ang tingtugnaw, mangadto na kita sa habagatan!” Pero dili niya kini mahimo, nahigtan na man gud siya.

¹²¹ Busa usa niana ka adlaw niagi ang usa ka lalaki ug nakita ang makaloolooy’ng uwak, busa giadtoan siya sa maong lalaki ug gigunitan siya ug gibuhian, og miingon, “Sige na, langgam, libre ka na.” Kita n’yo? Ug dayon, mahibaloan mo na lang, magsige lang lakaw-lakaw ang uwak.

¹²² Ania na kadtong ubang mga uwak, nagasinggit, “Adto na ta, Johnny Crow! Caw, caw, caw! Mangadto na ta sa habagatan, nagasingabot na ang tingtugnaw. Mamatay ka dinha sa tugnaw.”

¹²³ Paglingi niya didto, miingon, “Dili ko kana mahimo.” Kita n’yo, dugay na siyang naanad nga nahigtan, kita n’yo, ang pagdahum niya nga nahigtan gihapon siya.

¹²⁴ Mahimong ang pagdahum mo nahigtan ka, sa gihapon, igsoong lalaki, igsoong babaye, nga nagsulat niini nga pangutana. Mahimong naghunahuna ka nga nahigtan gihapon ka sa yawa didto, pero ang yawa namakak. Usa ka higayon kaniadto miabot sa yuta ang usa ka Lalaki, si Jesus Cristo, ang Anak sa Dios, gibuhian ka Niya sa pagkahigot. Ayaw toohi kadto; dili mo kinahanglan nga magpabilin dinha, dili, sir, gawasnon ka na. Husto kana. Namatay Siya nga kapuli mo aron sa pagkuha sa imong mga sala. Motoo ka lang Kaniya, ikapakapa mo lang ang imong mga pako ug molupad palayo kauban ang uban pa kanila. Ayaw pagpabilin diha nianang gahong sa yawa. Ayaw gyud, sir.

Karon. Mahimo ba nga pandongan mo ako og mga kamot ug nga makalingkawas na niana?

¹²⁵ Minahal nga igsoong babaye o minahal nga igsoong lalaki, siyempre, gusto ko ikaw pandongan sa mga kamot, pero dili kana makapalingkawas kanimo. Ang magpahigawas sa imo, ikaw . . . mao ang masabtan mo nga gawasnon ka na. Nabadbaran ka na sa pagkahigot. Dili mo na kinahanglan mabalaka bahin sa pagkagawasnon, tungod nga gawasnon ka na! Gihimo ka na ni Jesus nga gawasnon na. Dili ka lang magpagapos pag-usab sa yugo sa pagkaulipon. Gawasnon ka na karon. Dili mo na kinahanglan magpahigot pa. Ang pagpandong sa akong mga kamot diha kanimo usa lamang ka tradisyon. Mahimo pud natong buhaton kana. Bueno, sige, mahimo kong buhaton kana, pero dili ka gihapon mapahigawas niana hangtud nga dawaton mo kung unsa na’y gibuhat Niya para sa imo; tungod ako ra kana nga nagasulti “Ginoo, nagatoo ako Niini.”

¹²⁶ Bueno, ipandong mo lang ang imong mga kamot Kaniya pinaagi og pagtoo, nga nagaingon, “Ginoo, ginatoohan ko Kini,” dayon mao na kana. Husto kana, isugid sa imong mga sala. Kita

n'yo, "Siya nga nagatago sa iyang mga sala dili mouswag, ang nagatabon sa iyang mga sala. Pero ang mosugid sa iyang mga sala . . ." Dinha ka magdawat og kagawasan ug pagpamatarung, sa dihang andam ka mosugid "Nakasala ako, nasayup ako." Kana ang imong gisulti dinhi:

Nahulog ako, nakasala ako. Nasayup gayud ako! Aduna pa ba'y kahigayonan para kanako aron bug-os nga mapasig-uli pag-usab?

¹²⁷ Sa walay pagduhaduha! Sa higayon nga gitinguha mo Kini, ginapakita niana nga gitunton sa Dios ang Panugtong-sa-kinabuhi aron nga haw-ason ka. Pagpahaw-as lang diha sa Iyang Panugtong-sa-kinabuhi sa pagtoo ug pag-ampo, pagkapakapa lang kauban ang uban pa nga mga agila nga sama niana, nga nagalupad pahilayo. Husto kana.

¹²⁸ Oo, ang pagpandong sa mga kamot, kana'y—halangdon kana nga butang, nagatoo ako niana. Nagatoo ako sa pagpandong sa mga kamot, nagatoo gyud ako. Pero dili kana ang nagapahigayon niini. Mahimo kong pandongan og mga kamot ang mga tawo, matag semana, ug wala gihapon kini mahimong kaayohan hangtud nga dawaton mo kung unsa ang gibuhat na ni *Cristo* para sa imo. Kana'y ako lamang pagpamatuod, ang pagpandong sa mga kamot. Gipandongan nila og mga kamot ang mga tigulang kaniadto. Gibuhat nila kadtong mga butanga, kini ang ilang pagpamatuod sa atubangan sa Dios nga gihatag nila ang ilang pagtoo niini, gihatag nila ang ilang pagtoo niini. Kita n'yo? Usahay, sama sa mga butang. . .

¹²⁹ Wala gyud ako mahisabti sa daghang mga higayon. Akong—aduna ko'y . . . kagabii. Nakahunong ako taliwala sa mga opinyon, ug ako—wala ko kabalo kung asa ako moliko. Ako—ako'y, sa kaugalingon ko, anaa ako sa taliwala sa mga opinyon, ako—wala ako kabalo kung unsay buhaton. Nanghinaut ako nga kini ang iglesiang natural lamang, o ang iglesiang espirituwal nga nagalingkod dinhi, diay, sa tan-aw ko wala man nila ginarekord kini mao nga isulti ko ang gusto kong isulti. Sila'y . . .

¹³⁰ Gusto ko og usa ka prangkahan nga pagpakighinabi uban ninyo, ug siguro buhaton ko gyud kini, bisan pa man. Aduna ako'y usa ka sinulat dinhi nga adunay usa ka Kasulatan, kung . . . Kung dili, gusto ko unta maghisgot mahitungod sa *Ang Pagpang-ebanghelyo Sa Kaulahiang-Panahon*, kung unsa ba gyud ang pagpang-ebanghelyo sa kaulahiang-panahon. Siguro iandam ko na lang kana sa ubang adlaw. Gusto kong makighinabi kaninyo gikan sa akong kasingkasing, gikan mismo sa kinasuloran sa akong kasingkasing.

¹³¹ Anaa ako taliwala sa mga opinyon, wala ko kabalo kung asa ko nga direksyon mopaingon. Nanginahanglan ako sa inyong mga pag-ampo. Kining gamay nga pag-sugyot dinhi,

mahitungod niining—mahitungod niining mga butanga, para lang kini makakuha og kahigayonan nga mahinabi kamo sulod sa pipila ka minuto. May uban pang butang nga gusto kong isulti sa inyo, kita n'yo. Naamgo ko nga duol na gyud kita sa usa ka butang. Karon, ayaw ninyo saypa sa pagsabot ako, ayaw buhata kini. Kita n'yo?

¹³² Usa ka tawo ang miduol kanako sa miaging adlaw ug nagpabati kadto og dili maayo kanako. Sa hunahuna ko, “Sigurado man ko nga dili gyud ako ingon niana ka luag sa pagpanudlo.” Kita n'yo? Ingon niya, “Igsoong Branham, sa sunod nga pila ka adlaw kinahanglan akong maoperahan, sa sunod nga kinse, baynte ka adlaw.” Miingon, “Sa hunahuna mo ba moabot na si Jesus, dili na ako kinahanglan pa nga moagi sa operasyon?” Kita n'yo? Nakita n'yo, nasayup kamo sa pagsabot Niini. Ayaw ninyo buhata kana! Kita n'yo, ayaw ninyo buhata kana,. Mahimong dili pa moabot si Jesus sa sunod nga lima ka libo ka tuig. Wala ko kabalo. Mahimong moanhi na Siya karong gabhiona. Mahimong moabot na Siya ugma. Wala gyud ko kabalo kung kanus-a Siya moabot, walay laing nahibalo. Sa tinuod lang, Siya mismo wala usab nahibalo. Mao kana ang Iyang gisulti. Wala gyu'y nakahibalo.

¹³³ Pero kabalo ba mo nga gipaabot ni Pablo adlaw-adlaw nga Siya moabot? Si Juan, didto sa Isla sa Patmos, nagdahum nga mabuhi pa siya aron makita kini. Si Ireneo kaniadto nagdahum usab nga moabot Siya sa panahon niya. Ang tanang uban pa kanila, si Polycarp, si San Martin, ang tanan sa nangaging kapanahonan. Naghunahuna ni Luther, “Siguradong mao na kini!” Ingon ni Wesley, “Kini na ang panahon.” Si Charles Finney, John Knox, Calvin, Spurgeon, ang matag usa kanila nanag-ingon, “Kini na ang panahon!” Si Billy Sunday, bisan hangtud sa niining adlaw karon, ang matag usa, “Kini na ang panahon!”

¹³⁴ Gipaabot nato kini. Wala kita kabalo kung kanus-a ang takna. Nagatoo ako nga kini na ang maong panahon, ug gusto kong ipataas ang kahayag sa sulo. Ug paminaw, ako. . . Sabta kini sa husto! Gusto kong ikinabuhi ang matag gutlo sa akong kinabuhi nga nagapaabot nga Siya moabot na sa sunod nga takna, pero gusto kong magpadayon ingon nga kini moabot napulo pa ka libo ka tuig gikan karon. Gusto ko gihapon magsabwag og mga binhi, mag-ani sa ani. Gusto kong iwali ang Ebanghelyo ug magpadayon nga sama sa dugay ko nang ginabuhat. Magpadayon nga ingon niana, nga nakahangad ang akong mga mata, nagabantay; ginabira ang duyan. . . ginakuha ang mga binangan, ang lugas. Ug dayon sa sunod tuig magapugas na usab ako og mga pananum, “Ginoo, abi ko moabot Ka na niadtong miaging tuig, pero kung wala man Ka miabot, basin moabot Ka na niining tuiga. Busa mananum gihapon ko sa akong mga pananum aron mapadaku ko ang akong mga anak.

Para kung magdugay Ka pa, may makaon pa sila; kung dili Ka pa moabot, magpaabot gyud ko Kanimo.” Ingon niana, kita n’yo, basta magpadayon lang kamo nga normal.

¹³⁵ Kung sa hunahuna ko nga moabot na Siya pagkabuntag, karong gabhiona iwali ko gihapon ang mao rang mensahe nga ginawali ko karon. Kung sa hunahuna ko nga moabot na Siya pagkabuntag, dili ako mogawas ug ibaligya ang akong sakyanan, dili ako moadto og buhaton ang ingon *niini*, *niana*, o ang *uban pa*. Magpadayon lang ako sama sa naandan, tungod kay sa matag takna ginapaabot ko ang pag-abot Niya. Tungod kay mahimo Siya nga moabot para lang sa imo, mahimo nga oras mo na karong gabhiona. Mahimong oras ko na karong gabhiona. Wala ko kabalo. Pero ang usa niini mamahimong oras na nato.

¹³⁶ Ug unsa man diay ang mamahimong kalainan kung nabuhi ako dinhi o gilubong na ako didto? Tungod kay kung nabayaran na ang akong silot nga kamatayon, mas mauna ako didto kay sa kang kinsa man nga tawong buhi. Husto kana. “Ginaingon ko kini,” Ikaduhang Mga Taga-Tesalonica, ika-5 nga kapitulo, “Ginaingon ko kini kaninyo diha sa mga Sugo sa Ginoo. Nga kita nga mga buhi ug nanghibilin hangtud sa pag-abot sa Ginoo dili magapugong o magauna kanila nga nangatulog. Kay ang trumpeta sa Dios patingogon, ug ang mga nangamatay diha kang Cristo mouna sa pagpamangon,” ang pribilehiyo sa mga nangamatay maoy mouna sila sa pagpamangon. Sa ingon nianang paagi nato mahibaloan nga anaa na kini, kita n’yo. “Dayon kita nga mga buhi ug nanghibilin mangausab, sa kalit, sa usa ka pagpamilok sa mata, ug pagalalinon pagtingub uban kanila, aron sa pagsugat sa Ginoo diha sa kawanangan.”

¹³⁷ Busa unsa man diay nga kalainan ang himoon niini kung namatay man ako niadtong panahon ni Noe, kung namatay man ako niadtong panahon ni Abraham, kung namatay man ako niadtong panahon sa mga apostoles, kung namatay man ako duha ka semana ang milabay, o kaha mismo karon? Unsa man diay nga kalainan ang mahimo niini? Mamaatua man gihapon ko didto sa kalit, diha sa usa ka pagpamilok sa mata, nagapahulay lamang ako hangtud nianang panahona.

¹³⁸ Karon, ang pagtigum mamahimong alang sa Ginoo. Sama ni Jacob, diha sa ika-49 nga kapitulo, ingon niya, “Pagmoabot ang Shilo, ug ang panagtigum mamahimong alang Kaniya. Wala ni usa ka maghahatag-sa-balaod ang pagakuhaon hangtud . . . taliwala sa iyang mga tiil, hangtud nga ang Shilo moabot,” nga si Juda ang ginahisgotan, “ug maiya ang pagkamasinulondon sa mga katawhan.”

¹³⁹ Karon, daghan kaayong mga tawo ang nagapaabot alang sa usa ka iglesia, nga usa ka dakung grupo kono sa mga tawo ang dungan pagasagawon, usa ka iglesia, usa ka denominasyon,

kung unsang kredo kono ang pagasakgawon. Dili kana mao. Dili kana mao man lang.

¹⁴⁰ Ang panagtipon sa mga tawo, sa dihang dungan nang panawgon sa Dios ang Iyang panon, Mahimong mokuha Siya og duha gikan sa Jeffersonville, duha gikan sa Indiana, duha gikan sa Kentucky, duha gikan sa Mississippi. Ingon niana mismo ang gisulti Niya; dili mismong ingon niana nga pagkasulti, pero ang ingon Niya, “Adunay duha nga atua sa umahan,” didto kon diin adlaw pa, “Kuhaon Ko ang usa ug ibilin ang usa. Adunay duha diha sa higdaanan,” nga sa pikas bahin sa kalibutan gabii na, “Kuhaon Ko ang usa ug ibilin ang usa.” Kita n’yo?

¹⁴¹ Ang panagtipon sa mga tawo dili mamahimong grupo-grupo, nga para sa usa ra ka grupo *dinhi*. Kini mamahimong pang-tibuok kalibutan nga panagtigum sa mga nabanhaw, ug ang Pagsakgaw mahitabo sa ingon niana pud nga paagi. Tungod kay ang sulti Niya, “Sa dihang ang usa nakatulog sa *niining* tukaw, ang usa pud sa *nianang* tukaw, ang usa diha sa... hangtud sa ikapitong tukaw. Ug dayon sa dihang miabot na ang Pamanhonon, nahigmata silang tanan, ang matag usa, gikan pa kaniadto sa panahon sa Genesis hangtud sa katapusan sa Pinadayag. Nahigmata ang matag usa kanila, husto kana, aron mangandam sa pagsulod.”

¹⁴² Karon, nakita n’yo, ginapakita Niya nga ang tanan sa mga patay mabanhaw gikan sa lubnganan, sa Iyang pag-abot, ang matarung, ang Pangasaw-onon, ang mga nangatulog nga anaa sa lubnganan mamangon sa pagkabanhaw. Dayon ginapakita Niya nga ang mga tawo nga buhi pa sa yuta, mamahimong usa *dinhi* ug usa pud *didto*, dili kini grupo-grupo sa mga tawo nga nagkatigum diha sa usa ka ginagmay’ng grupo. “Kay adunay usa sa umahan, o duha nga atua sa umahan, kuhaon Ko ang usa ug ibilin ang usa,” adunay usa gikan sa Iglesia kon diin duna pa’y adlaw. Didto pud sa pikas bahin sa kalibutan, “Adunay duha diha sa higdaanan, kuhaon Ko ang usa ug ibilin ang usa.” Husto ba kana?

¹⁴³ Busa kanang panagtigum mamahimong alang ngadto kang Cristo bisan ako man anaa sa Jeffersonville, bisan ako man anaa sa Sweden, bisan ako man... Ug bisan asa man nga bahin kini, ang panagtigum mamahimong alang ngadto sa Magbalantay. Kita n’yo? Ug dayon magkauban kita nga pagasakgawon dungan sa mga nabanhaw aron sa pagsugat sa Ginoo diha sa kawanangan. Mga tawo nga gikan sa tanan nang bahin sa yuta, nga mga buhi. Ang mga tawo pud nga nangamatay na, ug uban pa, mamangon. Ug magkauban ang Iglesia pagasakgawon aron sa pagsugat sa Ginoo diha sa kawanangan. Kita n’yo?

¹⁴⁴ Ang Iyang Pag-abot pang-tibuok kalibutan. Dili kini para lang sa Louisville. Dili kini para lang sa mga Baptist, sa mga Presbyterian. Kini mamahimong “mga putli diha sa

kasingkasing ang maoy makakita sa Dios,” ug ang pagkabanhaw ug ang panagtipon magagikan sa tanang dapit.

¹⁴⁵ Ug, karon, karon, karon—man kini mahitabo? Tingali karong gabhiona, tingali ugman adlaw, tingali karong tuiga, tingali singkuwenta pa ka tuig, tingali usa ka gatus pa ka tuig, tingali usa ka libo pa ka tuig. Wala ko kabalo. Walay nakahibalo. Pero kita—kita, kamo ug ako, kinahanglan nga magkinabuhi karong gabhiona nga daw sa kini mahitabo na karong gabhiona.

¹⁴⁶ Pero, karon, kung ipadayon mo sama sa gisulti mo niini, “ako—ako pagaoperahan.” Bueno, kung kinahanglan ka gyud nga operahan, ug wala ka’y pagtoo para mamaayo, sige ipadayon lang gud ang pagpa-opera.

¹⁴⁷ Kung mopalit man ako og usa ka—usa ka . . . Adunay mianhi ug gihatagan ako og usa ka sinulat sa miaging adlaw, ug miingon, usa—usa ka bililhong sinulat, ug miingon, “Igsoong Branham, wala ko kabalo kung unsay akong buhaton.” Miingon, “Ako ug ang akong asawa matinud-anon kaayo sa Dios kutob sa among mahimo. Gimatuto namo ang among mga anak.” Ug miingon, “Karon, nalibog lang ako,” miingon, “aduna kami’g . . . nakatigum kami para sa usa ka uma, nakapalit og usa ka uma.” Ug miingon, “Ganahan gyud mi niini! Adunay tubod didto; adunay usa—usa ka sapa nga nagadagayday sa maong tibuok lugar.” Didto kono kini sa Oregon. Ug miingon, “Nakadungog kami nga mobisita ka sa Oregon. Isulti ko kanimo kung unsa ang napagdesisyonan namo nga buhaton. Kabalo kami nga . . . Nahunahuna namo nga igahin kini para sa mga bata, tungod kay walay Cristohanon sa ila.” Miingon, “Naghunahuna kami nga igahin namo kini para sa ila tungod nga mahabilin man sila dinhi aron moagi sa kasakitan, ug igahin kini para sa ila ug para binlan sila og kung unsang butang, tungod nagatoo kami nga mahiuban kami sa Pagsakgaw. Busa wala kami kabalo kung unsay buhaton bahin niana, busa tingali pagmoabot ka ihatag na lanang namo kining umahan sa imo, kita n’yo, ug dayon ikaw na ang bahala kung unsa man ang gusto mong buhaton niini.”

¹⁴⁸ Gisulatan ko siya ingon nga tubag, miingon ko, “Mahunahunaon gyud ka nga naghunahuna ka sa imong mga bata.”

¹⁴⁹ Miingon, “Ako ug si mama nagaadto didto, ug paggabii.” Miingon, “Andam na ako nga moretiro, ug,” ang ingon, “ang mga malipayong oras nga aduna kami, pagginasuroy namo ang umahan, nga ginasud-ong ang tuboran, ug manindog didto nga nagadayeg sa Dios.”

¹⁵⁰ Ingon ko, “Ipadayon lang ninyo kana, magkinabuhi kamo nga sama niana, sa pisikal, sa materyal. Basta magpadayon lang hangtud sa pag-abot Niya. Kita n’yo, magpabilin lang mo dinha, magpadayon lang hangtud sa pag-abot Niya.”

¹⁵¹ Sigeha lang, ang pagplano, himoa n'yo kining, “Kung itugot sa Ginoo! Kung itugot sa Ginoo! Buhaton ko *kini*, kung itugot sa Ginoo.” Mahimong moabot na Siya sa wala pa kana. [Blangko nga bahin sa teyp—Ed.] Basta magpadayon lang sama sa ginabuhat ninyo hangtud sa... Pero siguradoha nga ang inyong kalag andam pirme, nga, mahimo Siyang moabot unsa mang oras. Kita n'yo, pagpangandam gyud. Kay, nakita ninyo, mahimong moabot Siya para lang sa *inyo* unsa mang minuto, unsa mang segundo, sa sunod nga pagpitik sa kasingkasing, sa sunod nga pagginhawa, mahimong moabot Siya para kanimo. Pero ipadayon lang ang pagbuhat kung unsa man ang gusto ninyong buhaton, basta nga tinuod kini ug disente ug matarung, sigeha lang ug padayona lang.

¹⁵² Karon, nahibalo kita nga aduna kita'y ginaatubang. Kabalo ko niini; kabalo kamo niini. Ako—ako—wala ko kabalo kung asa ako nga direksyon mopaingon. Nadumdoman ba ninyo mga upat ka tuig na ang milabay, usa niana ka adlaw didto sa Chicago, miabot sa ako ang Espiritu sa Ginoo ug miingon ako, “Mao na kini! Ug human na ang rebaybal, ug gibalibaran na sa Amerika ang iyang kahigayonan.” Nakarekord kini sa teyp. “Ug dili na magkaaduna pa. Ang katapusan niyang kahigayonan iya nang gibalibaran.”

¹⁵³ Gusto kong matikdan ninyo. Aduna ba'y nakahibalo kung unsay petsa kadto nga narekord sa teyp? Aduna kita niini. Aduna niini sila ni Leo ug Gene. Nadungog ko kini dinhi dili pa lang dugay. Gimantala na kini ni Boze sa iyang mantalaan. Ug busa tan-awa ninyo mismo kung unsa ang nahitabo sukad niadto, kita n'yo, mihunong na ang rebaybal.

¹⁵⁴ Gisulti ko kadto didto sa—sa Blue Lake niadtong usa ka gabii, ug mibalik ang usa ka lalaki pagkasunod buntag, miingon, “Tingali ginasulti ni Igsoong Branham nga wala na ang mga Pentecostal, pero dili ako! Himaya sa Dios! Alleluyah,” ug kung unsa pa. Kita n'yo, pero wala kabalo ang maong lalaki kung asa nga tumoy sa budyong siya nagahuyop. Kita n'yo, wala niya nasabtan. Kita n'yo, wala siya kabalo. Maayo man kana, ang may pagkadasig, okey ra kana.

¹⁵⁵ Pero tan-aw kamo sa palibot! Unsay ginabuhat nila? Unsa na'y nagakahitabo sa mga tawo? Unsa na'y nahitabo sa rebaybal? Unsa na'y nahitabo kang Billy Graham, Oral Roberts, sa uban pa kanila? Asa na ba ang rebaybal? Tapos na kini! Nihupas na ang aso. Napugas na ang binhi. Tapos na ang panagtigum. Napalong na ang kalayo. (Didto sa karaang templo sa Roma, sa vesta, sa dihang napalong na ang mga kalayo didto sa mga altar, ang mga magpapatigayon namauli na.) Karon, makita nato nga wala na'y rebaybal. Wala na'y kadasig.

¹⁵⁶ Dayon nahunahuna ko kadtong mahitungod sa suba niadtong 1936, madumduman ko ang gisulti Niya. Unsay

nahitabo didto? Daghan sa inyo ang nakahibalo. Batan-on pa ako kaniadto, ug nagabautismo sa una kong pagbautismo sa dihang nanaug ang Manulonda sa Ginoo ug mitindog mismo didto sa kung asa ako. Ang sulti sa ubang mga tawo, “Wala mo kini nakita.” Dayon gipamatud-an sa siyensiya nga mao gyud. Kita n’yo? Kita n’yo?

¹⁵⁷ Karon, unsa ang gisulti Niya didto? “Maingon kaniadto, nga si Juan Bautista gipadala aron sa pag-andam sa unang pag-abot ni Cristo, ang imong Mensahe mao ang magauna sa ikaduhang Pag-abot.”

¹⁵⁸ Namatikdan ko kana sa tibuok kalibutan, mikaylap kini sa tibuok kalibutan. Halos magbuntag lang, mikaylap ang rebaybal sa tanang dapit. Nagdilaab ang mga kalayo sa rebaybal sa tanang dapit, napahigayon ang pinakadakung rebaybal nga nasaksihan nato sukadsukad. Pero aduna ba’y bisan unsang butang sa wala pa kana? Wala ni bisan usa! Duha ka semana sa wala pa kana, nadungog ko ang usa ka lalaki nga namulong didto sa New Albany, miingon, “Mitoo kaniadto ang mga tawo sa dakung publisidad mahitungod—mahitungod sa rebaybal, sama ni Billy Sunday ug kanila.” Miingon, “Kabalo kita nga dili na mahimong magkaaduna pa og mga ingon niana. Gusto sa mga tawo ang konkretong ebidensya; wala na’y ingon niana!” Sa dihang ginahimo nila kadtong dakung publisidad, dungan niadto gipabuto pud sa Dios ang pinakagrabeng rebaybal nga nagkaaduna kita sukad pa sa unang gatusan ka tuig, mas daghang mga tawo ang naluwas: minilyon.

¹⁵⁹ Ginapakita sa estadistika nga ang mensahe sa usa ka tawo molungtud lang og tulo ka tuig, ni bisan kinsa man kanila, dayon mabuhi siya sa iyang reputasyon sa nahabilin nga panahon hangtud nga tawagon na siya sa Dios. Karon, ingon na niana kini sukad pa kang Cristo, ang sa Iya tulo og tunga sa tuig, kita n’yo. Ug ginapakita nga ingon niana gyud hangtud na, sa ila ni Spurgeon, Knox, Calvin, hangtud karon, ginapakita niana nga tulo hangtud tulo ug tunga ka tuig ang limitasyon para sa pagministerio sa usa ka tawo. Ang uban pa. . . Naupos na ang iyang kandila, mabuhi na lang siya sa kung unsa ang reputasyon niya kaniadto. Kung dautan siya, ang iyang—iyang mga buhat nagasunod kaniya; kung siya matarung, nagasunod ang mga buhat niya sa iya. Ingon niana mismo.

¹⁶⁰ Karon, unsa ma’y buot ipasabot niana? Dugay na akong nagawali niining iglesia dinhi ug nagsulti sa inyo nga “Nagtoo ko nga adunay usa ka halangdon nga moabot.” Nagatoo ko ug nasulti na sa inyo nga “Nagatoo ako nga ginasuportahan sa mga Kasulatan nga magkaaduna og usa ka mensahero sa katapusang kapanahonan sa iglesia.” Nagatoo ako niana. Gipaabot ko ang maong tawo nga magpakita, giatngan nako sa kanunay.

¹⁶¹ Ug anaa nakita ko ang usa ka tawo nga mitungha, madungog

ko siya, usa ka inila nga tawo nga sugod magpakaylap, namatikdan ko nga ang mensahe niya simang sa Biblia. Nakita ko siya nga mibalik didto sa usa ka suok. Kita n'yo? Makita ko ang usa pa nga mitungha, nga mipadulong didto, pero wala siya miapil sa mga agila, nagpabilin siya taliwala sa denominasyonhong mga uwak. Nagpabilin mismo *dinhi*, sa iyang organisasyon, ug usa pa nagpasulod og mas daghang mga miyembro ug uban pa. Gibantayan ko kini, pero nakita ko kini nga nagakunhod.

¹⁶² Nahunahuna ko, “Dios, asa na man kanang magpasig-uli sa Pagtoo sa mga amahan ngadto sa mga anak? Asa man itanum sila nga mga Binhi? Asa na man kini? Unsa na ang mahitabo?”

¹⁶³ Karon miabot na kini sa ingon niini. Kung—kung kanang Mensahe didto sa suba niadtong adlaw, kung kini mao na kana, nan haduol na ang Pag-abot sa Ginoo, nga halos ania na. Kung dili man, adunay pagkalma sa dili pa ang bagyo. Wala ko kabalo. Wala Niya kini gipadayag sa ako. Gipaningkamotan kong pamalandongan, “Mao na ba kadto ang opisyal Niyang Mensahe? Mao ba kadto ang gusto Niyang isulti ko? Mao na ba kadto ang higayon nga nagsugo Siya? Mao na ba kadto tanan? Kung mao man, siguradong kita’y, siguradong haduol na gayud. Mas haduol na kay sa inyong pagdahum. Kung dili pa, aduna ra og pagkalma sa dili pa moabot ang bagyo.

¹⁶⁴ Karon, adunay misulat sa ako dili pa lang dugay, ug nangutana kanako, miingon, “Kung wala ka nagatoo nga moagi ang iglesia sa panahon sa Kasakitan, unsa man ang Pinadayag 13, kung unsa nga nagmadaugon man sila pinaagi sa Dugo sa Cordero ug sa ilang pagpamatuod?” Ingon niana ang pangutana sa maong tawo. Nakapamalandong ako. Naamgo ba ninyo nga ang unang tulo ka kapitulo sa Pinadayag nagahisgot man sa Iglesia diha sa kapanahonan sa Iglesia? Kana ang panahon sa Kasakitan, dili ang kapanahonan sa Iglesia; Pagasakgawon ang Iglesia ug misaka Kini diha sa ika-4 nga kapitulo sa Pinadayag, wala na mitungha pag-usab hangtud sa ika-19 nga kapitulo sa dihang miabot na Kini kauban ni Jesus. Husto kana. Sa panahon na kana sa Kasakitan, wala kini kalabutan sa Iglesia man lang.

¹⁶⁵ Ang tanan niining kahibulongang mga saad mahitungod sa bililhong mga butang nga nakita ninyo sa Biblia, sama sa kung unsay magakahitabo, para kana sa gingharian sa mga Judio, dili *dinhi* sa mga Gentil. Nagatoo ako nga pagatigumon sila niining usa nga gilauman nga moabot aron ipasig-uli ang Pagtoo sa mga tawo, nga gisaad kaniadto. Ug ang bugtong paagi nga nahibaloan ko kana, tungod sa gisulti Niya, “Dihadiha pagkahuman sa niining Mensahe, nga, ang yuta pagasunogon sa kainit, sa kalayo.” Tugoti akong basahon kana mismo sa inyo samtang ania kita, ug bantayi ninyo kung unsay ginasulti Niini.

¹⁶⁶ Ug karon kini nga gamay’ng mensahe sa Gingharian, siguro

iwali nako sa sunod na nga Domingo sa buntag, kung itugot sa Ginoo, kita n'yo, ug kung kabubut-on sa Ginoo.

167 Karon tan-awa ninyo dinhi, ania ang pag-abot ni Juan, Malaquias 3:

Ania karon, ako . . . nagapadala sa akong sinugo sa dili pa ang Akong . . . nagapadala sa akong sinugo, ug siya magaandam sa dalan sa atubangan ko: ug ang Ginoo, nga inyong gipangita, moabot sa hinanali sa iyang templo, bisan ang sinugo sa tugon, si kinsa inyong gitinguha: ania karon, siya moabot na, nagaingon ang GINOO sa mga panon.

168 Nakita n'yo kana? Malaquias 3. Sa Mateo karon, matikdi ninyo ang Mateo sa ika-11 nga kapitulo, ug paminawa ninyo kini, ug ang ika-6 nga bersekulo. Basahon nato karon ang Mala- . . . Mateo 11, nagasulti si Jesus. Ug karon sugdan nato sa ika-11 nga kapitulo:

Ug nahatabo, nga sa pagkahuman ni Jesus sa paghatag sa Iyang mga sugo sa iyang napulo ug duha ka mga tinun-an, migikan siya didto sa pagtudlo ug pagmantala sa lungsod nila.

Ug karon sa nakadungog si Juan didto . . . bilanggoan sa mga buhat ni Cristo, nagsugo siya og duha sa iyang mga tinun-an,

Ug pag-ingon kaniya, Ikaw ba kadtong moanhi, o magapaabut pa ba kami'g lain?

169 Nakita n'yo ang kasubo sa maong propeta? Kabalo Siya nga aduna gyu'y nagakahitabo, pero dili niya sigurado kung asa kini, kita n'yo, kita n'yo, sa kung unsa gyud ang nagakahitabo. "Ikaw ba Siya?" pagkahuman nga iya na Siyang gipaila.

Ug si Jesus . . . miingon kanila, Pangadto kamo ug ipakita ninyo kang Juan ang mga butang nga inyong nadungog ug nakita:

Ang mga buta nanagpakakita, . . . ang mga bakol nanagpakalakaw, ang mga sanlahon nahinloan, . . . ang mga bungol nakadungog na, ang mga patay nangabanhaw, ug ang mga kabus gikawalihan sa maayong balita ngadto kanila.

Ug bulahan siya, ang kinsa man nga dili makakaplag kanako og kahigayonan sa pagkapangdol.

Ug sa paglakaw na nila, si Jesus misugod sa pagsulti ngadto sa kadaghanan mahitungod kang Juan, . . . (Karon paminawa ninyo!) . . . Unsa ang giadto ninyo sa pagtan-aw sa kamingawan? Usa ba ka bagakay nga ginakusokuso sa hangin? (Dili, dili ingon niana si Juan, walay pagpakigkompromiso kang Juan.)

. . . unsa ba ang giadto ninyo sa pagtan-aw? Usa ba ka tawo nga nagasul-ob og mga panapton nga hamili? (Sa laing pagkasulti, pinatindog ang mga kuwelyo, kabalo na mo, ug manggialamon ug inila nga tawo) ania karon, ang mga nagagamit og mga panapton nga hamili anaa sa balay sa mga hari. (Ang nagahalok sa mga masuso, ug nagpangminyo sa mga batan-on, ug nagpanglubong sa mga patay, ug, kabalo na mo, o nakigkuyog-kuyog sa mga hari. Ingon niana nga klase, dili gani siya mogunit og pangduhaan nga kamot nga Espada. Kita n'yo?)

. . . Karon, unsa ang giadto ninyo sa pagtan-aw sa kamingawan? Usa ba ka tawo ug ang iyang ginasul-ob, ug ginakusokuso sa hangin?

. . . Usa ba ka tawo nga nagasul-ob og mga panapton nga hamili? ania karon, ang mga nagagamit og mga panapton nga hamili anaa sa mga palasyo sa mga hari.

Pero unsa ba ang giadto ninyo sa pagtan-aw? Usa ba ka manalagna? oo, nagaingon ako kaninyo, ug labaw pa kay sa manalagna.

170 Matikdi ninyo! “Tungod kay kini . . .” Paminawa ninyo karon, mao kini ang Mismong mga Pulong ni Jesus:

Kay kini mao siya, ang hingtungdan sa nahasulat, Ania karon, ako nagapadala sa akong sinugo sa atubangan sa Akong Pagtoo, ug siya . . . sa nawong, ug siya nagaandam sa dalan sa atubangan mo.

171 Karon matikdi ninyo ang Malaquias 3:

Ania karon, ako . . . nagapadala sa akong sinugo, ug siya magaandam sa dalan sa atubangan ko: . . . (Malaquias 3, dili Malaquias 4.)

172 Karon matikdi ninyo ang Malaquias 4:

Kay, ania karon, ang adlaw moabot na, nga nagasunog daw hudno; ug ang tanang mga palabilabihon, oo, ug ang tanang nanagbuhay sa kadautan, mangahimong tuod sa mga balili: . . . ang adlaw nga moabot na nga magasunog kanila, nagaingon ang GINOO sa mga panon, . . . nga kini dili magpabilin kanila bisan sa gamut o sanga (kana ang Kasakitan ug kalaglagaan, kita n'yo, nga magaabot).

Apan kaninyo nga may kahadlok sa akong ngalan ang Adlaw sa pagkamatarung magasubang nga adunay kaluwasan sa iyang mga pako (ang pag-abot sa Ginoo); ug kamo manggula ingon nga . . . kamo manggula, ug managlumpat sa kalipay sama sa mga nating vaca sa toril. (Sama kana nga nagagawas sila paingon sa sibsibanan, nagapaadto na.)

...pagatamakan ninyo ang mga dautan; kay sila mangahimong abo sa ilalum sa mga lapa-lapa sa inyong mga tiil sa niana adlaw nga Akong pagahimoon kini, nagaingon ang GINOO sa mga panon.

173 Sa laing pagkasulti, ang matarung, sa pagbalik nila sa yuta uban ni Cristo, pagatunoban ang mga abo. Sa dihang makita ninyo kining mga tawo, nga mapahitas-on, arogante, salawayon, mahimantayon, ug bisan pa niana nanag-angkon nga mga Cristohanon, sila walay lain kondili mga abo. Ingon niana sila mismo. Kana ang ginasulti sa Kasulatan. Kita n'yo? Karon matikdi.

Hinumdumi...ang kasugoan ni Moises nga akong alagad, nga akong gisugo...kaniya didto sa Horeb alang sa tibukok nga Israel, bisan ang kabalaoran ug ang mga tulomanon.

Ania karon, akong ipadala nganha kaninyo si Elias ang propeta sa dili pa moabot kanang daku ug makalilisang nga adlaw sa GINOO:

Sa dili pa ang mismong Adlaw, ang pagbalik sa Ginoo, moabot una si Elias.

174 Bueno, hinumdumi ninyo, sa umalabot pa. Karon, dili kini mamahimong ang pag-abot ni Juan. Siya nga si Elias, pero moabot si Elias sa lima ka higayon, karon. J-e-s-u-s, p-a-g-t-o-o, g-r-a-s-y-a. Kita n'yo, ang numerong lima mao ang numero sa "grasya." Motungha si Elias sa lima ka higayon: ang unang higayon mao si Elias mismo; dayon ingon nga si Eliseo; ingon nga si Juan; dayon sa katapusan ngadto sa mga Gentil; ug dayon kauban na niya si Moises ngadto sa mga Judio. Hingpit nga numero, ang hingpit nga propeta, hingpit nga mensahero, estrikto, maisugon. Kita n'yo? Matikdi ninyo:

...akong ipadala nganha kaninyo si Elias...sa dili pa moabot ang Adlaw, daku ug makalilisang nga adlaw sa GINOO:

Ug iyang pabalikon ang mga kasingkasing sa mga amahan ngadto sa mga bata, ug ang mga kasingkasing sa mga bata ngadto sa mga amahan, tingali unya ako moanhi ug samaran ko ang yuta pinaagi sa usa ka panghimaraut.

175 Kita n'yo, dili ang unang pag-abot niadtong pagpaila; si Juan kadto, tungod kay wala pa man nasunog ang yuta nga mangahimong tuod sa balili, wala pa ang mga matarung nagtamak sa mga abo sa dautan. Pero sa dili pa kini mamahitabo, moabot una si Eliseo. Ug unsay buhaton niya? Ipahiuli niya ang Pagtoo sa mga anak ngadto sa amahan, sa orihinal nga Pagtoo sa Biblia.

176 Pagmay makita akong moabot nga lalaki, mahunahuna ko, “Siya na siguro kini. Pag-adunay tawong motungha diha sa kabantog, tan-awon ko siya, kung asa paingon ang mga iglesia.” Unsay ginabuhat niya? Usa ka libo ka milya nga simang sa Biblia. Unsa ma’y gibuhat niya? Paadto nganhi, mahutdan og hangin ug mahagba na. Kita n’yo, “Nagabaton og dagway sa pagka-diosnon ug nanagdumili sa Gahum niini.” Nanagdumili sa Pagtoo, dili motoo sa Biblia, ingon nga, nanghawid sa mga kredo, sa mga denominasyon, gapanganak og denominasyonhong mga anak. Sigurado gyud kining mahugno. Anaa siya nga diretsong nagabalik.

177 Asa na man kadtong magapugas nianang Binhi para sa Iglesia sa katapusang-panahon? Asa na man kanang nagkahinog nga Binhi, kanang gisaad nga Elias? Ug dihadiha pagkahuman sa iyang mga adlaw moabot na ang dakung Kasakitan ug ang pagkasunog sa yuta.

178 Ug dayon sa pagbalik na sa Iglesia ug sa Pangasaw-onon, pagatumban sa Pangasaw-onon ug ni Cristo ang ilang mga abo, diha sa Milenyum, sa dihang ang yuta gihinloan na sa kalayo. Ug didto sila managhari. Ug ang mga pagano nga wala pa sukad nakadungog sa Ebanghelyo pagabanhawon nianang panahona, ug mapadayag ang mga anak sa Dios. Kung siya magahari, kinahanglan nga magkaaduna siya og pagaharian, kinahanglan aduna siya’y ginsakupan. “Ug sila nagmando ug naghari uban ni Cristo,” ug pagaharian ni Cristo uban sa olisi nga puthaw, ang mga nasud. Dayon ang Ebanghelyo . . . Dayon ang napadayag nga mga anak sa Dios, aduna na’y kagahum sama Kaniya sa dihang ania pa Siya kaniadto, kita n’yo, sa Milenyum mahitabo kana nga Paghari, kita n’yo, ibabaw sa mga abo.

179 Busa nagpaabot ako alang sa maong butang. Miagi na ba kini sa ato nga wala nato namatikdan tungod sa kayano niini ug mao nga napalagpas nato? Nahitabo na kaha kini ug nahibilin na ang iglesia diha sa iyang mga sala? Kung ingon man niana, nan ulahi na kini kay sa inyong pagdahum. Pero kung dili pa, nan adunay usa nga moabot nga ma’y dalang Mensahe nga nagsumikad gyud sa Biblia, ug molibot sa kalibutan ang paspas nga buhat. Maimprinta ang mga Binhi sa mga mantalaan, sa mga basahon, hangtud madungog Kini sa matag predestinadong Binhi sa Dios. Walay usa kanila ang moduol gawas kung pagadanihon sila sa Amahan, ug ang matag usa nga pagadanihon sa Amahan madungog gyud Kini ug moduol. Mahitabo gyud kana, madungog gyud sa predestinadong Binhi ang Pulong.

180 Dayon pagmahitabo na kana, mahitabo ang usa ka panagtigum. Ug motungha si Jesus, ug pagasakgawon ang Iglesia gikan sa tanang dapit sa kalibutan nga ingon niana, dungan sa mga nabanhaw, ug mokayab.

181 Mamahimo ba kaha kining sama sa pag-abot ni Juan kaniadto, nga bisan ang mga piniling tinun-an wala mahibalo niini? Ang ingon sila, “Nganong nagasulti man ang mga escriba nga si Elias kinahanglan mouna usa’ sa pag-anhi?”

182 Ingon Niya, “Nahianhi na siya ug wala kamo nakahibalo niini.” Pero miingon, “Nangabuhat na gani nila kung unsay ilang nangasulti nga ilang buhaton ngadto kaniya.” Paspas kaayo ang iyang mensahe, kung tan-awon n’yo, ngadto sa tibuok Israel, ug nahitabo lang diha sa usa ka gamay’ng da-. . . duha—sa duha ra ka gamay’ng dapit: sa ubos lang sa Jerusalem ug sa maong dapit, o didto sa Enon kon diin si Juan nagaadto aron nga magbautismo, ug didto mismo sa suba kon diin siya nagabautismo, mihubas na kadtong suba. Sulod lang sa unom ka bulan, ug natuman kadtong tibuok nga pagpaila sa Mesias. Kita n’yo?

183 May wala ba kita’y nakita? Ulahi na kaha kini kay sa atong gihunahuna? Prangkahan nga pagpakighinabi kini karon. Kini, karong gabii lang, para mismo. . . Oo, kita lang—kitakita lang ang nagka-istorya dinhi. Ulahi na kaha kini kay sa atong gihunahuna? Mao na kaha kadto ang Mensahe didto sa suba niadtong adlaw? Miagi na kaha kini, ug napalagpas Kini sa mga tawo? Mao na kaha Kini? Kung ingon niana man ulahi na kay sa atong gihunahuna. Kanus-a kaha kini mamahitabo? Wala ako kabalo. Mahimong karong gabii na. Mahimong sa sunod nga singkuwenta ka tuig pa. Wala ko kabalo kung kanus-a gyud kini, magpadayon lang ako sama sa ginabuhat ko karon. Bueno, unsa man kini? May ginapaabot pa ba ako?

184 Aduna ko’y talagsaong damgo sa miaging gabii, nga nagpaguol kini kanako tibuok adlaw. Kasagaran dili kaayo ko gadamgo. Pero nagkaaduna ko og usa ka damgo. . .

185 Mosangyaw ako kaniadto sa bisan asa, ug kasagaran kong ginawali kana nga Mensahe ug may makita akong usa dinhi ug usa pud dito nga ginadawat Kini. Pagbalik nako ug iwali ang mao gihapong Mensahe ug ginapahangad na sa mga tawo ang ilang ilong ug mohawa. Unsa ma’y problema? Nakasala na ba sila og ayo nga nalapas na nila ang adlaw sa grasya? Nakasulod na kaha ang pinakaulahi? Human na kaha kini? Nagahulat na lang ba kita sa kalaglagan? Ang tanan ba niining mga gubat nga nagakahitabo nga sama niana mga pagpahiandam na kanato?

186 May kung unsang butang nga andam nang mahitabo. Pero sa dili pa kini mahitabo, gikuha na ang Iglesia. Dili gayud ako uyon nga ang Iglesia moagi sa Kasakitan! Giunsa man ninyo pagbulag sa usa ka tipo gikan sa usa ka anti-tipo? Kita n’yo? Nakasulod na sa arka si Noe sa wala pa mahulog ang usa ka tulo sa ulan. Nakagawas na si Lot sa Sodoma sa wala pa mahulog ang kalayo. Kita n’yo? Ingon ni Jesus, “Maingon man usab sa nahitabo kaniadto sa ilang mga adlaw mao usab ang mahitabo

sa pag-abot sa Anak sa tawo.” Dili kinahanglan nga moagi sa paghukom ang Iglesia, tungod nga anaa naman kini kang Cristo.

¹⁸⁷ Ang gikinahanglan nato mao ang paghingpit sa mga balaan. Wala makasabot ang mga balaan, kita n’yo, sila’y. . . Dili sila kabalo kung unsay hunahunaon, kita n’yo. Karon kita’y. . .

¹⁸⁸ Kung husto kana. . . Kung dili man, adunay moabot nga paspas kaayo, magkaaduna og dakung pagmantala. Naniid ako, wala ko kabalo kung asa na nga direksyon mopaingon.

¹⁸⁹ Kagabii nagdamgo ako. (Dayon tapuson na nako.) Nagdamgo ako, talagsaon nga damgo. . .

¹⁹⁰ Naghigda ako didto nga nakigsulti sa akong asawa, mahitungod sa umaa-. . . Bag-o lang kami miampo, ug ako. . . Adunay usa nga, ang batang si Dallas, nanawag siya nga aduna kono kini naisuksok nga kung unsa sa iyang dalunggan, ug giadtoan nako. . . Nagdugo, ug kinahanglan na niyang dalhon sa doktor. Ug miadto ako aron iampo, ug ang ingon sa Espiritu Santo, “Maayo na.” Kita n’yo?

¹⁹¹ Ania na siya, nga ayo na. Ingon sa doktor, “Hala, abi nako’g magkaaduna ka na og. . .” Miingon, “Nasamdan mo ang eardrum mo, nabuslot, ug nagatulo gikan niini ang dugo, ug kung unsa pa.” Tanan nang. . . Sa sunod nga pagbalik—pagbalik namo, wala na siya’y gisulti bahin niadto. Wala kabalo kung unsay nahitabo, kita n’yo, wala na’y impeksyon, wala na’y bisan unsa. Kita n’yo?

¹⁹² Dayon adunay mitawag, ug mosulod ako sa lawak ug mag-ampo. Mga usa pa ka adlaw nanawag sila, miingon, “Tapos na. Maayo na gyud! Nagpadayon na!”

¹⁹³ Ug nakigsulti ako sa iyang asawa, miingon ko, “Langga, sulod sa halos usa ka tuig ug upat ka bulan wala ko halos kabalo kung asang direksyon ako mopaingon.” Miingon ko, “Wala ko kabalo kung unsa.” Miingon siya. . . Gihisgotan namo kung unsay buhaton. Miingon ko, “Wala ko kabalo kung unsa ang buhaton, ania ako ug nalibog. Ginapaabot ba nato. . . Ang usa ka gamhanan nga propeta sa Dios. . . nga moabot na sa eksena aron isangyaw kanang butanga? Mahibaloan kaha kini sa publiko?”

¹⁹⁴ Sa hunahuna ko, “Sukwahi kana sa Kasulatan. Dili, gyud: ‘Moabot Siya sa oras nga wala ninyo gihunahuna.’” Kita n’yo? Ug wala ko kabalo kung unsa ang buhaton. Wala ba nato kini namatikdan? Sa hunahuna ko, “Ayaw kong maghigda-higda lang dinhi sa balay.” Sa hunahuna ko. . . Ug nanghinaut ko nga wala kini naka-teyp; kung naka-teyp man kini, gub-a ninyo ang teyp o ipadaplin kini. Kita n’yo? Karon ingon niya, kung. . . miingon ko, “Kung mao na kini, mas haduol na kita kay sa atong gihunahuna.”

195 Adunay usa ka butang nga kinahanglan . . . nga mahitabo. Mahimong may mahitabo kanako karon. Ug dili nako makita kung nganong wala Niya ako gipasagdan niadtong atua pa ako sa mismong lingkuranan sa miaging adlaw, dayon, kita n'yo, kung wala na'y uban pa nga buhaton. Ngano man? Nganong wala man ako milakaw? Unsa'y nahitabo? May buhaton pa ba akong ubang butang? Sa hunahuna ko, "Bueno, kung kini ang Mensahe ko, malagmit ihangad na sab sa mga tawo ang ilang ilang og motalikod Niini."

196 Dayon, adunay Butang nga nagatawag kanako ngadto sa langyaw nga mga lugar. Madungog ko ang tawag tabok sa dagat, nga nagagikan sa tanang lugar.

197 Bag-ohay lang miabot ang sulat sa miaging adlaw, nagsulat si Igsoong Ligger og usa—usa ka libro mahitungod sa panagtigum didto sa Durban. Ingon niya, "Wala gyu'y mahisama niini. Wala pa sukad nakatagamtam og ingon niana nga pag-uoyog ang Africa. Sulod sa usa ra ka gabii nagkaaduna ang mangitngit nga yuta sa Africa og pagtay-og nga wala pa nila sukad nasinati kaniadto sa ilang kinabuhi." Husto kana, didto taliwala mismo sa mga pagano.

198 Nagtan-aw ako didto, nakita nako kadtong mga makalolooy'ng negro, bililhong mga tawo, nakita ko ang pagtratar sa mga tawo didto kanila nga mora ba'g . . . mas grabe pa sa mga ulipon. Nakita ko ang usa ka gamay'ng batang lalaki . . . ug akong . . . nga nagtrabaho didto, ug miingon ako . . . Kadtong bataa, imo gayud . . . Kamong mga kababayen-an dili gyud ninyo mabuhat ang ingon kadaghang trabaho sulod sa duha ka adlaw [Blangko nga bahin sa teyp—Ed.] o sulod sa tulo ka adlaw, bisan unsa pa kamo ka kugihan magtrabaho, sama sa kinahanglan buhaton niadtong bata nga lalaki sulod sa usa lang ka adlaw. Matulog siya sa usa ka paleta sulod sa usa ka daang lawak-hugasanan, nga halos upat ra ka pye ang gitas-on ug upat ka pye ang gilapdon, nga nakatikuko didto. Ug bayaran lang siya og usa ka pound kada bulan, kana'y mga duha ra ka dolyar ug otsenta sentimos. Ug wala siya gitugotan nga kaonon bisan man lang kadtong mga salin-salin gikan sa lamesa, gawas lamang sa usa ka timba sa ginaling nga mais; nga ang ikatulo niini, pamahaw niya; ang ikatulo niini paniudto niya; ug kadtong nahabiling ikatulo maoy pangpanihapon niya sa gabii. Nagtrabaho hangtud alas diyes, o alas onse, alas dose; mobangon pagkabuntag aron atimanon ang masuso ug tanan nang uban pa, ug lampasohan ang hagdanan ug hinloan ang sakyanan sa amo. Ug ang daku, tigulang, tambok nga inahan walay ginabuhat gawas nga paglingkod lang didto ug ginapalagitik ang iyang mga kuko ug moinum og tsaa, pagkatapulan, dili-mapuslan.

199 Kinahanglan gyud nga trabahoon niadtong luoy'ng bata ang tanan nga buluhaton. Ginaubo na siya, ug mora ba'g ginasisip-on siya, nga naga "Hauh, hauh, hauh." Ug usa niana

ka adlaw mitan-aw ako didto, ingon ko, “Kanang batang lalaki wala baya ninyong. . . Nganong dili man ninyo siya dad-on sa panagtigum?”

²⁰⁰ “Usa man gud siya ka kaffir.” [Blangko nga bahin sa teyp—Ed.] Buot ipasabot niana usa ka “salbahis.” Dili ikatingala nga masuko sila sa ingon nianang tawag sa iya. Ako, man pud. Kana nga lalaki igsoon ko. Ug atua siya didto. Dili siya usa ka ulipon. Walay kalabotan niana ang iyang kolor. Igsoon ko siya. Ug atua siya sa ingon niadto nga kahimtang.

²⁰¹ Migawas ako, gitawag nako siya “Thomas.” Makasulti og tulo ka pinulongan ang maong bata. Ug miingon ko, “Thomas?”

²⁰² Milingi siya, miluhod ug gipataas niya ang iyang mga kamot, miingon, “Oo, agalon.”

²⁰³ Ingon ko, “Tindog ka. Dili mo ako agalon, ako’y imong igsoon.” Giakbayan ko siya. Gitan-aw niya ako nga ingon niana, ug dagkung mga luha ang midagayday sa iyang mga aping. Ingon ko, “Thomas.”

²⁰⁴ Ug miabot ang Espiritu Santo ug nagkaaduna ako og usa ka panan-awon. Aduna ko’y gisulti kaniya. ug miingon siya, “Oo, agalon. Tinuod kana. Mao gyud kana.”

²⁰⁵ Ingon ko, “Thomas, mibiya na sa imo ang ubo, ug dili ka na magkaaduna pa niana.” Ug nawala gyud sa iya.

²⁰⁶ May mga kuwarta nga gisuksok sa mga tawo sa akong bulsa, aduna ako og halos usa ka gatus ug otsenta nga *pound* nga kuwartang papel (nga katumbas og duha ka dolyar ug otsenta ka sentimos). Ug nahadlok unta ko nga ihatag kadto kaniya; nahadlok ako nga basin makit-an siya sa iyang agalon nga aduna siya niana, maghunahuna unya sila nga gikawat niya kini ug bunalan hinoon siya hangtud mamatay. Dayon akong—miingon ako sa agalon, ingon ako, “Ako—gimahal ko kini nga batan-on. Tugoti ko nga hatagan siya og kuwarta.”

“Oh, dili! Dili! Ginasugyot mo siyang mag-abusar.”

²⁰⁷ Miingon ko, “Ikaw man gani ang abusado.” Kita n’yo? “Unsa ma’y ginahigda-higda mo dinhi? Ug wala ka’y ginabuhat. Kanang batan-on ang mao na’y nagabuhat sa tanang trabaho ug ginapasagdan mo lang siyang mamatay sa gutom. Siya may usa—usa ka inahan nga balo ug igsoon nga babayeng nag-antus sa sakit, ug dayon hatagan mo lang siya og usa ra ka dolyar. . . duha ka dolyar ug otsenta sentimos kada bulan.” Miingon ko, “Anihon mo ra kana sa umaabot nga adlaw! Aduna baya og duha ra ka milyon nga puti ug mga usa gatus ka milyon nga mga itum. Unsa na lang kung magkaaduna kamo og rebolusyon.”

Miingon, “Ayaw kana isulti didto sa Amerika, kung unsa ang nagakahitabo dinhi.”

²⁰⁸ Ingon ko, “Kinsa ma’y magsulti sa ako nga maghilom ko? Ang Dios lang.” Ingon, “Dili ikatingala nga may dakung kaikog

ang mga tawo, tungod sa pagtratar n'yo nga sama niana." [Blangko nga bahin sa teyp—Ed.] Mao kana. Ug gipanalipdan ko sila.

²⁰⁹ Usa niadto ka adlaw adunay duha ka ministro, nga pinatindog ang kuwelyo, nakabigote, ang miadto sa Rhodesia.

²¹⁰ Misakay ako sa eroplano nga gipiloto sa usa ka bag-o pa lang nga nahimong piloto didto sa usa sa mga tropikal nga bagyo, dayon milupad kami sulod sa mora ba'g duha-ka-milya, hataas sa kahanginan, nga pabali-bali. Wala kami kabalo kung pabaliskad na kadto; ang eroplano man gud nagsige'g bali-bali. Ug sa katapusan . . . Wala kami kabalo kung paubos na o pataas. Ug sa katapusan nakapaibabaw mi sa bagyo. Ug kasukaon kaayo ko pagkanaug namo!

²¹¹ Ang duha sa niadtong mga ministro, mga Pentecostal nga ministro, misakay sila sa usa ka sakyanan ug gihatud ako padulong sa Pretoria. Mikanaug ako gikan sa Habagatang Rhodesia; ug mikanaug ako didto ug kasukaon na, kaayo ko. Ug si Igsoong Baxter nga nagalingkod didto, kasukaon pud, ug si Billy Paul, kasukaon pud. Ug atua kami nga nagabiyahe agi niadtong compound; lugar kadto kon diin didto ang itum nga mga tawo nga nakabuhat og dili-maayong butang mao nga kinahanglan nilang biyaan ang ilang tribo, tungod sa kung unsang kasal-anan sa tribo, ug didto sila nagaadto. Ug dili na nila sila tugotan nga makasulod sa siyudad, busa nanagpuyo na lang sila ilalum sa sin o unsa man nga mapuy-an nila, hugaw kaayo ug tanan na, nga ingon niana. Ug miagi sila didto, ug nakita ko ang usa ka karatula didto, nag-ingon, "Baynte ka milya kada oras." Ug kadtong mga lalaki nagmaneho og saysentay-singko kada oras. Silang looy'ng mga inahan nanggidagan didto nga ginapanghakop kadtong gagmay'ng mga bata, nga nagkamuritsing, hubo, nga atua didto sa dalan, ug ang edad mga anaa sa duha ka tuig hangtud sa lima o unom; gipanghakop silang gagmay'ng mga bata, ug nanagsinggit. Hapit na niyang maligsan ang upat kanila usa ka higayon.

²¹² Gipikipik nako siya sa abaga, ingon ko, "Hoy! Unsa ma'y nahitabo sa imo?"

Milingi siya, miingon, "Unsay imong giingon?"

²¹³ Miingon ko, "Ang ingon ko, 'Unsa ma'y nahitabo sa imo?' Paghinayhinay pud!"

Miingon, "May mando kanamo nga mahatud ka didto sa eksaktong oras."

²¹⁴ Ingon ko, "Ginamandoan ta ka nga mohunong." Ug miingon siya . . . ingon ko, "Wala ka ba'y kalooy para nianang mga tawo?"

"Unsang mga tawo?"

Ingon ko, "Silang gagmay'ng mga bata didto nga hapit mo nang maligsan."

Miingon, “Mga Kaffir ra kana!”

²¹⁵ Ingon ko, “Makauulaw ka! Nga ginatawag mo ang imong kaugalingon nga Cristohanon?” Ingon ko, “Wala ka ba kabalo nga nabalaka kadtong inahan sa iyang anak, nga kung mapatay mo kini, ingon niana pud kaniadto ang kabalaka sa imong inahan sa imo?” Ingon ko, “Mahimong ignorante ang maong inahan ug walay hibangkaagan, pero ang pagmahal sa usa ka inahan nagahilak para sa iyang anak. Wala ka’y katungod para buhaton ang butang nga sama niana. Ug gitawag mo ang imong kaugalingon . . .” Ingon ko, “Ug usa pa, ang karatula miingon ‘baynte ka milya kada oras,’ miingon ang akong Biblia, ‘thatag kang Cesar ang kang Cesar.’” Ug giduko na lang niya ang iyang ulo. Ingon ko, “Hinayan mo nga mamahimong baynte ka milya kada oras ug trataron mo silang mga tawo sama nga imo silang mga igsoon.” Ingon ko, “Makauulaw ka, sa nianang butang.” Oh, grabe, mora sila’g mga baki nga nakatulon og bala! Pero bisan unsa pa man, nasulti ko ang angay kong isulti, ang punto ko.

²¹⁶ Ug miadto kami didto ug kabalo kadtong mga tawo nga sila ang giadto ko, aron dalhon sa ila ang—ang Mensahe sa Ebanghelyo. Ug ang Dios . . .

²¹⁷ Miadto sila didto, ug nagkasagol sila, ug gipapuwesto kadtong mga puti sa usa ka kilid, ug ang mga itum, ug ang mga itum didto dili gani puedeng mosulti ngadto kanila ni usa ka pulong, o bisan unsa. Mianha ang Espiritu Santo sa taliwala nila ug gipagawas ang mga masakiton ug ang mga nanag-antus ug mga bakol, ug gipang-ayo sila, ug gitugotan *sila* nga manglingkod didto bisan sa dakung kaikog nila. Ginapakita lang niadto nga nakigpatigayon ang Dios sa mga mapaubsanong kasingkasing!

²¹⁸ Karon, usa kana ka tawo nga wala pa nakadawat sa Mensahe ug siya ang nagasulat nianang libro.

²¹⁹ Karon, unsa ba ang angay kong buhaton? Ang butang, unsa ba ang angay kong . . .Ako—mobalik ba ako didto? Karon, kung ginatawag ako sa Dios sa ebanghelismo, nan dili ako mahimong propeta Niya ug ebanghelista nga dungan. Imo mismong . . .kini . . .Dili puede magsagol ang maong mga katungdanan, ako—ako lamang . . .Mamahimong ginatugbangan ko ang hangin. Kung gusto kong mamahimong ebanghelista, kinahanglan nga mamahimong akong ebanghelista. Kung gusto kong mamahimong Niya, moadto ako nga mag-inusara didto sa mga bukid ug magpuyo sa halayo; nga walay simbahan, walay kongregasyon, hangtud may madungog ako gikan sa Ginoo; ug mogawas ug ipahayag Kini, ug mobalik na usab didto. Kita n’yo? Usa sa nianang mga butang, tan-awon kung asa ang mas bug-at. O mahimong human na kini. Kinahanglan nga usa sa tulo nianang mga butang, para sa ako. Mahimong tapos na ang

Mensahe o kinahanglan kong buhaton ang usa sa duha niining butanga. Wala ko kabalo kung unsay buhaton.

²²⁰ Sa miaging gabii nagdamgo ako, ug nadamgohan ko nga padulong kono ako sa usa ka panagtigum, ug wala pa ako nakakita og ingon niana nga grupo sa mga tawo! Nagkatigum sila diha sa mora'g usa ka dakung estadyo, kutob sa makita ko. Ug may nagtabo sa ako nga dili si Billy, ug gidala niya ako didto. Ug atua ako sa sulod, nga nagaampo, ug paingon na ako sa . . . ilalum sa pagdihog; mora ba'g sama sa tawag nila niini, para masabtan ninyo, sama kini sa usa ka kambyo nga pinaagi niini mabati ko nga paingon na ako sa pagpang-ila. Ug sa pag-adto ko gisugdan akong estoryahon niadtong tawo ug, sa dihang giestorya niya ako, mibiya kadtong pagpang-ila. Dili ko na kadto mabati. Ug dayon gipaningkamotan kong birahon ang kaugalingon ko pabalik niini; dili ko mahimo. Dili ko na gyud mahimo. Ug gikapoy na lang ako.

²²¹ Ug gitan-aw ko ang panon sa mga tawo pag-abot namo didto. Ug pagtan-aw ko, miingon ko, “Bueno, aduna na ko'y usa ka teksto sa hunahuna ko tungod kabalo gyud ko niadtong mga organisasyon ug kung giunsa nila pagtratar sa mga tawo, mao nga iwali ko gyud kadtong Ebanghelyo kanila nga sama niana kutob sa akong mahimo.” Ug sa dihang naglakaw na ako padulong sa entablado, mibiya kadto kanako.

²²² Wala na'y pagpang-ila, wala na'y bisan usa sa niadtong mga mensahe; ug mitindog ako didto, ug bisan pa niana nanagpaabot ang mga tawo. Ug ingon ko, “Unsa na lang kaha ang buhaton ko?”

²²³ Ug Adunay miingon, “Ipadayon lang. Pagpadayon lang, kita n'yo,” ihatag ra kono kini pag-abot nako didto. “Magpadayon ka lang.” Kita n'yo? Dayon atua na ako sa entabla- . . . ug nakamata na ako.

²²⁴ Siguro tungod nga gihunahuna ko kadto, busa nakadamgo ako og ingon niadto. Basin tungod lagi niadto. Siguro espirituwal kadto nga damgo. Wala ko kabalo. Wala ako'y interpretasyon bahin niini, ako—wala gyud ko kabalo kung unsay buot ipasabot niini. Dili ko lang masulti sa inyo ug ako—wala ko kabalo kung unsa kini. Pero, kung unsa man kini, ania na ako sa usa ka kinasang-an nga dalan sa kung asa. Kita n'yo? Aduna gyu'y usa ka butang, usa ka butang sa kung asa man.

²²⁵ Ug ako—puede ako mosulti og usa ka butang, pero sa kanunay sayup ang pagkasabot kanako. O mosulti ako og *ingon niini*, ako . . . *ingon na niini* o *ingon na niana*, ang pagkasabot sa usa ka tawo bahin *niini*. Ug ang nagakahitabo, pag aduna ka'y isulti nga diretso sa usa ka punto, ug *ingon niini* ang pagkadungog Niini sa usa ka tawo, dayon pag isulti niya ngadto sa usa pa ug mausab kini og diyutay, ug ngadto sa usa pa samot pa kining mausab, dayon sa sunod na usab layo na kaayo, unya

Kini mamahimong dili na gyud mao. Mao nga pagkadungog Kini sa usa ka tawo sa *ingon niining* paagi, mopaingon gyud siya niining direksyon, nianang direksyon, ug nianang direksyon. Kita n'yo, ug pirti na kamong layoa. Ug ingon niana kini sa—sa mga panagtigum, ug uban pa, pag aduna gyud ka'y gustong Ipunto. Karon, patalinghugan sa mga Pinili kana nga Punto. Masabtan nila kana nga Punto! Kabalo sila, tungod kay eksakto ko lang gisulti kung unsa mismo ang buot niini ipasabot (Kita n'yo?) nga sama niana, ang Mensahe ra gyud, sa eksaktong paagi.

²²⁶ Karon, ug mao kana ang ginaingon ko, mora ba og kanunay'ng mas daghan ang sayup nga pagkasabot, og walay hunong kini. Unsa man kini? Ang... Naitanum ko na kaha ang tanang mga Binhi nga kinahanglan kong itanum? Haduol na ba ang panahon? Andam na bang mosulod sa eksena kining bililhong mensahero karon? Haduol na ba ang pag-abot sa Ginoo? Pagtawag na ba kini gikan niining nasud padulong ngadto sa ubang nasud? Ginapabiya na ba Niya ako gikan sa pagpang-ebanghelyo?

²²⁷ Hinumdomi ninyo nga ako...gisulti ko usab kini sa akong asawa. Daghan sa inyo sa libro...Niadtong adlaw nga gipahimutang ko kanang batong pamag-ang, halos traynta ka tuig na ang milabay, mismo dinha sa suok, nagsulti kini kaniadto...Niadtong buntag sa dihang gipukaw Niya ako, ug naglingkod ako didto sa sulod, dili pa gani ako minyo kaniadto o unsa man, usa pa lang ako ka batan-ong magwawali, ingon Niya, “Buhaton mo ang buluhaton sa usa ka ebanghelista. Dili... Dili ka ebanghelista, kondili buhaton mo ang *buluhaton* nga iya sa ebanghelista,” nga gikutlo ang usa ka Kasulatan sa ako. Pag-adto ko didto ug nakita ko kadtong duha ka kahoy, nga giputol ang usa gikan *dinhi*... oneness ug trinity. Wala ko sila gikrus, gitatum ko sila nga ingon niana. Dayon nakita Niya nga nahulog kadtong bunga sa kamot ko ug dayon gitultulan Niya ako padulong sa Kalbaryo. Karon paminawa n'yo, ang ingon Niya, “Paggawas mo dinhi, basahon mo ang Ikaduhang Timoteo 4, Ikaduhang Timoteo 4.”

²²⁸ Ug gibiyaan ko Niini nga naglingkod sulod sa lawak. Ni wala ko kabalo nga usa diay kadto ka panan-awon. Wala ko kabalo kung unsay itawag niini kaniadto. Ginapahimutang ko kaniadto ang batong pamag-ang (niadto mismong adlaw) sa pundasyon dinha. Nasulat kini, nga napahimutang mismo dinha karon sa batong pamag-ang, ug ang ingon:

...buhata ang buluhaton sa pagka-ebanghelista, buhata ang bug-os nga panghimatuod sa imong buluhaton.

Tungod kay ang takna taliabot na nga sila dili makalahutay sa maayong pagtulon-an; hinonoa subay sa ilang kaugalingong mga pangibog...magapaalirong

sa ilang kaugalingon sa tingub sa pagtudlo—mga magtutudlo, nga magahapohap sa ilang mga nagakatol nga mga dalunggan;

...ug molingiw gikan sa Kamatuoran *ngadto sa mga sugilanon.* (Kana'y parehong oneness ug trinity, napalabay nila ang...)

²²⁹ Karon, wala Niya sukad gisulting “ikaw usa ka ebanghelista,” ang ingon Niya, “Buhata ang *buluhaton* sa usa ka ebanghelista.” Kita n’yo? Karon, miabot na ba ang panahon? Ipadayon ko ba kana o miabot na ba ang panahon nga kinahanglan lahi na? Wala ko kabalo.

²³⁰ Mao kana ang gusto ko, usa ka prangkahan nga pakig-estorya sa inyo. Ug sobra na ako sa oras ko karon, aron ipapauli na unta kamo, pasayloa ko sa paghawid ko kaninyo’g dugay.

²³¹ Pero, kung itugot sa Ginoo, sa dili pa moabot si Igsoong Boze sa Dominggo, tingali moanhi ako sa Dominggo sa buntag ug siguro mamulong mahitungod sa *Pang-gabiing Panahon Nga Ebanghelismo*, o mora’g ingon niana, kita n’yo, kung okay ra sa imo, pastor. [Nagaingon si Igsoong Neville, “Okey ra! Dalaygon ang Dios!”—Ed.] Kon itugot sa Ginoo, sa sunod Dominggo sa buntag. Ug mamulong unta ko mahitungod niana karong gabii, ug makig-estorya nga prangkahan siguro sa ubang panahon, pero mabati ko nga mas maayo nga sa ingon niini usab nga paagi, siguro, kung kana ang kabubut-on sa Ginoo.

²³² Ginaampo ko kamo. Iampo usab ninyo ako. Ayaw—ayaw ninyo nga basta lang isulti, “Igsoong Branham, buhaton ko.” Buhata gyud ninyo! Kita n’yo? Dinha ko nagasalig. Ako ang nanginahanglan og pag-ampo, kung mahimo Niya akong mapaadto sa kung asa man nga dapit. Hinumdomi ninyo, tawo ra ako, dili ako Dios. Tawo ra ako nga sama kaninyo, nga naningkamot hibalo ang kabubut-on sa Dios aron makalakaw ako niini. Walay makahibalo hangtud... “Ug siya nga kulangan og kaalam papangayoa siya sa Dios.” Ug mao kana ang ginabuhat ko, nagapangayo sa Dios. Ug ginapahayag ko kana sa inyo ingon nga akong iglesia, usa ka kinasingkasing nga pakigpulong. Unsa, asa na ba kita? Asa na kaha kita? Unsay oras na ba ang gikinabuhian nato? Ania na kita sa katapusan nga panahon, sa pagtoo ko. Nagatoo ko nga ania na kita mismo sa katapusan.

²³³ Karon, mahimo kining mopaingon sa usa ka direksyon o sa laing direksyon. Busa inyong... Mahimo nga human na ang trabaho ko, o ginatawag ako sa mga pagmisyong ngadto sa halayo, o mahimong Iyang himoon nga usa ka ebanghelista o usa ka magtatan-aw. Kinahanglan nga mahitabo ang usa sa mga niining butanga, tungod kay ania na ako sa katapusan. Wala ko kabalo kung unsay buhaton. Wala ko kabalo kung asa nga direksyon ako mopadulong. Bisan kining mga panagtigum, nga

hapit ko nang ipahigayon, ginaampo ko, ingon ko, “Ginoo, dili ko na kini buhaton sama sa kung giunsa ko kini pagbuhat kaniadto. Kung buhaton ko kini sama sa ginabuhat ko kaniadto, mobalik ako nianang ebanghelismo hangtud nga ihatag Mo sa ako ang tawag para sa kung unsa ang angay kong buhaton.”

²³⁴ Ako nang—ako nang naipugas ang Binhi sa tanang dapit, mikaylap na sa tibuok kalibutan ang mga teyp, milibot na sa tibuok kalibutan ang mga Mensahe ko, kabalo na ang tanang mga iglesia mahitungod Niini, sa tanang dapit, ug kung kinsa ang mga pinili sa Amahan Iya nang tawagon. Kita n’yo?

²³⁵ Ug karon mora ba’g nahimo na Kining usa ka dili maayo nga butang ngadto kanila. Oh, ayaw nilang magkaaduna og unsa man nga kalambigitan Niini. Dili, sir. Mao nga moadto na lang ba ako ug mag-ampo sa mga may sakit, ug hamubo na lang nga mensahe mahitungod niana, ug—ug tan-awon kung asa nga direksyon ako pangunahan sa Espiritu Santo? Mao kana ang anaa sa akong hunahuna nga buhaton hangtud nga motawag na usab Siya. Tungod kay ang tawo wala gyud kabalo kung unsa ang iyang buhaton hangtud nga masabtan una niya gikan sa Dios kung unsa ang angay niyang buhaton, hangtud nga mahibaloan mo na gyud ang imong direksyon.

²³⁶ Ug ako—dili ko gustong maghigda-higda na lang sa balay. Anaa na sa kasingkasing ko kini nga Mensahe. Nangamatay ang mga tawo, nagakahisalaag, paingon sa Eternidad. Unsa ma’y akong buhaton? Tugoti n’yo akong isangyaw Kini sa tanang dapit kutob sa mahimo ko, ug isulti ang mahitungod kang Ginoong Jesus hangtud nga bag-ohon Niya ang posisyon. Iampo ninyo ako, iampo ko pud kamo. Nanghinaut ako nga buhaton ninyo kana.

²³⁷ Karon, hinumdomi ninyo ang Miyerkules sa gabii, panagtigum sa pagpang-ampo, ug ang Biyernes sa gabii, ang panagtigum para sa mga kalalaken-an. Dinhi ba ipahigayon? Basin moanhi ako para makigkita kaninyong tanan, gisulti ko na sa inyo nga moanhi ako og magkitaay kita sa Biyernes sa gabii. Sige, dayon sa Dominggo sa buntag pud, kon itugot sa Ginoo, pagahisgotan ko ang mahitungod sa *Pang-gabiing Panahon Nga Ebanghelismo*, kung itugot sa Ginoo; mahimong mausab kini, wala pa ko mahibalo. Pero kana ang gihunahuna ko sa karon, ang mamahimong matang sa mga ebanghelista sa panahon sa kagabhion. Ug dayon sa Dominggo sa gabii, ang ipasalida ni Igsoong Boze, ug ayaw n’yo kalimti kana. Ug iampo ninyo kami, tungod sa sunod semana paingon na kami sa umahan sa mga anihonon, kon itugot sa Ginoo.

Do you love Him? Amen!

Will you serve Him? Amen!

Will you believe Him? Amen!

Amen! Amen!

He's the Father. Amen!

He's the Son. Amen!

He's the Holy Ghost. Amen!

Amen! Amen!

Still singing. Amen!

Amen! Amen! Amen! Amen!

Do you love Him? Amen!

Is He coming? Amen!

Are you ready? Amen!

Amen! Amen!

Could be tonight, are you ready? Amen!

In the morning, are you ready? Amen!

Anytime, are you ready? Amen!

Amen! Amen!

Still singing. Amen!

And shouting. Amen!

And praying. Amen!

Amen! Amen!

Come Lord Jesus. Amen!

Get Your Church ready. Amen!

We're making ready. Amen!

Amen, Amen!

Want to see my mother. Amen!

Want to see my father. Amen!

I want to see my Saviour. Amen!

Amen! Amen!

Oh, do you love Him? Amen!

Will you serve Him? Amen!

Do you love Him? Amen!

Amen! Amen!

²³⁸ Among Langitnong Amahan, kini ang among...usa ka gamay'ng *Amen* nga kanta. Gustong-gusto namo ang Imong pagtudlo, nga tanan kami nagasulti og "Amen!" Gihigugma namo ang Espiritu, "Amen!" Nagatoo kami nga Siya umaabot, "Amen!" Matag Pulong nga Imong gipamulong diha sa Imong Biblia, Ginoo, ginapuntohan namo Kini og "Amen!" Nagatoo kami sa matag Pulong Niini, nagatudlo Niini sa pinakamaayo sa among kahibalo, sa paagi lamang nga pagkasulti Niini, matag panulbok, matag giyon, matag tulbok, matag coma, sa paagi lamang sa pagkasulat Niini, sa pinakamaayo sa among kahibalo.

²³⁹ Oh Dios, ibalik kanamo, Ginoo. Ihatag kanamo ang halangdon nga katagbawan nga among gipangandoy, nga madungog namo usa niana ka adlaw ang pagtingog sa mga Anghel samtang sila magalanog diha sa usa ka koro nga Alleлуйah sa mga kalangitan, samtang magpakita si Jesus didto ug ang Iglesia pagasakgawon.

²⁴⁰ Mahibulong ang mga dili-magtotoo, “Unsay nahitabo, unsa ba’y nahitabo kanila nga mga tawo? Asa na sila miadto?” Oh Dios, dili nila masabtan, dili nila gani Siya makita. Pero makita Siya sa Iglesia, kanang, mga tinawag-pagawas, ang mga Pinili, ang mga natawo-na-pag-usab, kalit na lang sila mawala. Dili mahibalo ang mga tawo kung asa na sila, ang nahibaloan lang nila nga nangawala sila; pero kauban na nila ang ilang Ginoo.

²⁴¹ Dayon nianang orasa, Ginoo, dili ba nga makalilisang nga butang ang mahibilin dinhi, ang mahibaloan nga ang panahon sa kaluwasan milabay na diay? Wala na’y katubsanan! Ang ingon sa Kasulatan, “Siya nga mahugaw magmahugaw sa gihapon, siya nga dili-balaan magmadili-balaan sa gihapon.” Oh, mahimong grabe nga panahon kana!

²⁴² Hinaut nga mangandam na kami karon, Ginoo. Pagkamaanindot nga panahon kini kung mangandam lamang kami aron sa pagsugat Kanimo, Amahan, ug iandam ang among mga kasingkasing adlaw-adlaw. Ug kung makabuhat man kami og sayup ug mahulog, sama niining looy’ng kalag karon nga nagsulat niining pangutana, ipahibalo Mo kanila nga ginahinloan sa Dugo ni Jesus Cristo ang tanang kasal-anan. Wala tuyoa nianang tawo nga buhaton kana, Ginoo. Gipanggutom sila ug gipang-uhaw, nga nagapaningkamot nga makabalik ngadto sa pagpakig-fellowship sa Espiritu. Ibangon sila, Ginoo. Sakgawa sila paibabaw niining madag-umon, masubo nga kalibutan; paibabaw, kon diin ang Sidlak-sa-adlaw makasidlak na usab sa ilang mga kalag. Nangahulog man gud sila ngadto sa ubos sa—sa—sa kapunawpunawan sa—sa mga panganod, ug nangahulog sila ngadto sa lapok, ngadto sa kasal-anan. Pero nagkinabuhi nga kaniadto ibabaw nianang Kahayag-sa-adlaw. Sila—gusto nila nga makabalik pag-usab, Ginoo. Dawata sila pag-usab karong gabhiona, Ginoo. Ug kung adunay tawo dinhi nga wala pa sukad nakasaksi nga makaadto didto sa ibabaw, ug nahibalo mismo nga . . .

²⁴³ Ang tanan niining mga missile dinhi ug tanang mga butang tukma gyud sa Imong Pulong, tukma gyud sa paagi nga kinahanglan mahitabo ang maong mga butang. Ug makita namo ang kalibutan sa iglesia kung unsa na ang nagakahitabo kanila. Among—makita namo nga—nga kini sama na gyud sa mga adlaw ni Noe, sama sa mga adlaw mismo sa Sodoma, eksakto gyud sa kung unsay gisulti ni Jesus nga mamahitabo; ang mga dagkung balod; kung unsa na manglihok ug mamisti ang mga kababayenan, ug kung unsa nga mamahimo silang hilabtonon sa kinabuhi sa uban, ug—ug molakaw nga sama sa paglakaw nila, nga dili-natural ug pinakiaykiay pa, ug kung unsa na lang. . . tukma gayud sa kung unsay gisulti sa propeta. Mao gyud kung unsay gisulti ni Daniel, “Ang puthaw ug yutang-kolonon dili gayud magkauyon.” Ug, oh, ang tanan, nangatuman na, Ginoo. Ania na gyud kami sa katapusan nga panahon. Nangahulog na ang

mga landong, Ginoo. Nagapangidlap na ang mga pula nga suga, nagabagting na ang mga kampana.

²⁴⁴ Oh, Dios, ipaamgo sa Imong katawhan nga sa dili madugay motunob na ibabaw sa yuta ug sa dagat ang Anghel ug ipataas na ang Iyang mga kamot ug moingon, “Walaon na ang panahon!”

Dayon Oh, daw sa unsa nga pagpanghilak ug pagminatay,
Sa dihang suginlan na ang mga nahisalaag sa ilang mga kapalaran;
Mangtu-aw sila ngadto sa mga bato ug sa mga kabukiran,
Magaampo sila, apan ulahi na kaayo ang pag-ampo.

²⁴⁵ Karon na ang adlaw sa kaluwasan. “Siya nga may igdulogog magpatalinghug sa ginaingon sa Espiritu ngadto sa mga iglesia.” Itugot kini, Ginoo.

²⁴⁶ Hinaut nga wala ni usa ka tawo nga ania karon ang dili maapil nianang adlaw sa Pagsakgaw. Hinaut nga mapuno kami sa gugma sa Dios ug sa Espiritu sa Dios hangtud nga kuhaon kami sa Balaang Espiritu uban sa mga nanaghulat, o bisan nga kung kami man mopahulay na diha sa among bahin. Sama sa gisulti Mo kang Daniel, “Padayon sa imong panaw, Daniel, kay mopahulay ka. Apan niana nga adlaw magatindog ka diha sa imong bahin.”

²⁴⁷ Oh Dios, ang ingon Mo, “Ang mga nagpabalik sa kadaghanan. . . gikan sa kasal-anan ngadto sa pagkamatarung mas labaw nga magadan-ag kay sa mga bitoon hangtud sa kahangturan.” Pagkaanindot nga adlaw! Apan sila nga mga dautan isalikway ngadto sa kalaglagan. Oh Dios, himoa nga maamgo sa tawo ang ilang mga posisyon karon diha sa kinabuhi, aron sila mamalik ngadto sa Usa nga Matarung sa dili pa ulahi ang tanan sa kahangturan. Itugot kini, Amahan.

²⁴⁸ Karon uban sa pagduko nato sa atong mga ulo sa kadali, sa panapos nga pag-ampo, aduna ba’y usa nga gustong mahinumdoman, nga nagaingon, “Igsoong Branham, ginapataas ko ang akong kamot, dili sa imo kondili sa Dios. Magmaloloy-on unta ang Dios sa ako ug mamaatua ako nianang adlaw, nga nahugasan na sa Dugo sa Cordero”? Panalanginan ka sa Dios. Panalanginan ka sa Dios, ikaw, ikaw, ikaw, ikaw, daghang mga kamot.

²⁴⁹ Karon, Amahang Dios sa Langit, panalangini ang, matag usa. Nakita Mo ang ilang mga kamot. Nasayod Ka sa ilang mga kasingkasing.

²⁵⁰ Ug naamgo namo, Ginoo, nga kami. . . adunay butang nga andam nang mahitabo. Kabalo niini ang kalibutan, nagakanta sila sa mga kalantahon, ug sa telebisyon nanag-awas ang neurotikong mga komedya ug mga kalantahon. Unsa ma’y

ginabuhat nila? Sama ra sa usa ka gamay'ng batang lalaki nga nagapanaghoy diha sa kangitngit, samtang nagaagi siya sa sementeryo, nga grabe ang kahadlok, nga naningkamot nga hupayon ang iyang pagkanerbiyos pinaagi sa pagpanaghoy. Ginalimbongan lang niya ang iyang kaugalingon. Mao pud kining nasud nga patawa-tawa lang, nagakomedyo, nagbiay-biay, sama sa gisulti Niini nga moabot ang panahon nga buhaton nila ang ingon niana, "Modangup sa mga sugilanon gikan sa Kamatuoran," ug kung unsa nga "sa katapusang mga adlaw moabot ang mga mayubiton ug mga mabiay-biayon," ug kung unsa nga kining mga butang sa katapusan nga panahon, "mga gahi'g-ulo, mapahitas-on, adunay dagway sa pagkadiosnon, pero ginatalikdan ang Kamatuoran," ug makita na namo kini karon.

²⁵¹ Oh Dios, pukawa ang mga tawo! Ipaamgo kanila nga mahimo silang makasiguro karon nga sila nakalabang na gikan sa kamatayon ngadto sa Kinabuhi. Sa dihang gidawat namo si Cristo, ang Balaang Espiritu, mikayab na kami ibabaw sa kalibutan. Dayon nasayod kami nga nabanhaw na kami kauban Siya, ug ginapaabot na lang namo kanang pagkausab kon diin mohunong na ang kamatayon diha sa mortal nga mga dapit, nga kining gagmay'ng mga ligid sa mortal nga kinabuhi nga nagapalihok sa among mga igbabati, pagatubson na. Oh Dios! Ug dayon magkaaduna kami og usa ka lawas nga sama sa Iyaha ug mabuhi sa Eternidad uban Kaniya, ang bililhong Yutang saad, nga naangkon na ang Ebidensya.

²⁵² Ayaw itugot nga mapalagpas kini ni kinsa man, Ginoo. Sa mga nagpataas sa ilang mga kamot, hinaut unta nga sila maanod (karong gabii) paingon ngadto sa Gingharian. Tingali sa pagpauli nila, mahimong isulti sa lalaki ngadto sa iyang asawa, "Palangga, aduna baya'y miigo kanako karong gabhiona"; o mosulti ang asawa ngadto sa bana, "Honey, ako—ako man pud mibati og talagsaon gayud." "Oo, palangga, mangluhod kita dinhi sa kilid sa higdaanan. Wala pa nato sukad nabuhat kini, pero mag-ampo kita karong gabhiona. Pangayoon nato sa Dios nga magmaloloy-on kanato ug tigumon kita. Gimahal ko ikaw, palangga."

²⁵³ Ug ang—ang usa, isulti sa lalaki ngadto sa babaye, ug kung unsa gyud nila kamahal ang usa'g usa, "ako—ako—gusto kong mahiadto sa Langit uban kanimo. Dili ko gusto nga dili maapil nini. Ug sa umalabot nga adlaw sa dihang naka-Pauli na kita ug gunitan ko ikaw sa bukton ug magalakaw kita didto sa dakung pasilyo ug mga tanaman sa Eternidad, kon diin ang karnero ug—ug ang leon magkauban nga manggihigda, ug ang lobo ug ang—ang baka magkauban nga manggihigda. Ug dili na magkaaduna pa og kamatayon ug wala na'y kasubo. Ug samtang magalakaw kita didto ug ang palibot gipuno sa mga alawiton, sa mga Anghel, ang mga koro nga anaa sa itaas nato, samtang

ginaabi-abi kitang ginadawat sa mga Anghel ngadto sa atong Puloy-anan, gusto ko nga kauban ka didto, pinangga. Ako—gimahal ko ikaw. Siguro natigulang ka na, madumdoman ko ikaw niadtong naminyo ko nimo, ang maanyag nimong nawong.” “Ug—ug ikaw, ug madumdoman ko ikaw, pinangga, niadtong usa ka pa ka gwapong batan-on.”

²⁵⁴ Pero kining tanan igabalik. Siya nga naglilok sa imong maanyag nga nawong kaniadto aduna na og—og kopya niini diha sa Iyang hunahuna. Mahimo Niyang ililok kini pag-usab didto kon diin dili na kini molubad. Oh Dios, itugot nga mahibaloan sa mga tawo nga dili kini usa ka tinumotumo nga damgo, kondili kini usa—usa ka Kamatuoran, ug Dios, ang Balaang Espiritu, ania aron magpamatuod niana. Gilitok sa Iyang Pulong sa paglabay sa mga kapanahonan ang mahitungod niini. Itugot nga balikan namo ug tan-awon, basahon ang among kasaysayan. Ug ang kinsa man nga tawong nagmadaugon sa yuta maoy tawong, tawo nga may kahadlok-sa-Dios, bisan sa among mga Presidente sama nila Washington, Lincoln, ug uban pa, *mga Josue*, ug—ug mismong . . . *mga Moises*, ug sila nga mga . . . Mga bantugang lalaki sa kalibutan nga maoy mga tawong mitoo niana, ug mga tawong giselyohan ang ilang pagpamatuod, ug nagpaabot na didto para sa pagkabanhaw. Anaa sa amo ang mga unang bunga niini, ang maong Patinga.

²⁵⁵ Ginaampo ko karon nga pinaagi sa akong pag-ampo Imong dawaton kini nga mga tawo uban sa ilang pag-ampo ug pasudla sila sa Gingharian. Ginapangamuyo namo kini sa Ngalan ni Jesus. Amen.

²⁵⁶ Panalanginan kamo sa Dios, nga puno og kalooy sa inyo, nga padan-agon ang Iyang nawong sa inyo, ug ampingan kamo, ug panalanginan kamo sa tanang mga panalangin nga Langitnon.

²⁵⁷ Karon ginasulti ko kini, dili sa kabangis, kondili sa gugma. Nagaampo ako nga kamo nga mga wala pa nakaila Kaniya, nga ang unlan unta ninyo mamahimong gahi nga dili kamo mismo makatulog, ang inyong pagkaon unta mamahimong daut hangtud sa dili na kamo makakaon, hangtud nga mopadaplin kamo sa usa ka lugar ug magsulti, “Ginoo, kaloy-i ako.” Dili kana sa pagtinguha og unsa man nga kadaut sa inyo. Para kana sa ikaayo kaninyo, igsoong lalaki, igsoong babaye. Nagaampo ko nga mamaingon niana gyud unta kaninyo.

Until we meet! till we meet!
Till we meet at Jesus' feet; (Till we meet!)
Till we meet! till we meet!
God be with you till we meet again!
God be with you till we meet again!
By His counsel guide, uphold you,
Smite the threatening waves before you;
God be with you till we meet . . .

258 Karon morag pareho ra sa kaniadto, makiglamano kita sa uban karon.

Till we . . .

Ginoong Jesus, himoon...?...ayo na, tangtanga ang impeksyon ug hatagan siya og kaayohan, Ginoo, sa Ngalan ni Jesus.

Till we meet at Jesus' feet; (Till we meet!)

Till we . . .? . . .

Till we . . .

. . . at Jesus' . . .

259 Madumdoman n'yo pa ba nga ginakanta nato kana nga mga kalantahan kaniadto? Atong...Ug kining usa pa nga ginakanta nato kaniadto, dugay na nga panahon, wala ko kabalo kung aduna ba'y buhi pa nga ania karon o wala, sa dihang naghinawiray kita og mga kamot kaniadto palibot sa usa ka daang sug-angan dinhi, ug yuta pa ang salog. Nadumdoman pa ba ninyo? Ginakanta nato:

We're marching to Zion,
Beautiful, beautiful Zion;
We're marching upward to Zion,
That beautiful City of God.

260 Kabalo ba mo sa Milenyum kung unsa ang Zion? Magkaaduna og usa ka Kahayag sa Zion, ug kini mahimong usa ka landong gikan sa adlaw sa buntag ug usa ka Kahayag pud sa gabii, tungod kay wala na'y gabii didto. Oh, grabe!

The fields of Zion yield
A thousand sacred sweets
Before we reach that Heavenly Throne,
Before we reach that Heavenly Throne,
Or walk the golden streets,
Or walk the golden streets.

Dungan ang tanan karon:

We're marching to Zion,
Oh, beautiful, beautiful Zion;
We're marching upward to Zion,
That beautiful City of God.

261 Ganahan gyud ko niana, nahunahuna ko nga maanindot kana. Karon, dili ba gusto ninyo ang kinaraan nga kalantahan? Sa tan-aw ko labi pa nga maanindot kini kay sa tinadtad nga kanta nga aduna kita sa karong panahon nga ginatawag nila nga mga kalantahan. Gusto ko gayud kana. Ug kaniadto ginakanta ko ang usa ka karaang kanta sa simbahan, kung madumdoman ninyo:

Lugar, lugar, oo, adunay lugar,
Aduna pa'y lugar sa Tuburan para sa imo.

262 Oh, grabe! Kadtong maanindot, karaang mga kalantahon, nagatoo ko nga dinihugan sa Balaang Espiritu ang igsusulat, nga nagsulat niadtong mga kalantahon.

Ang mas mapaduol, akong Dios, sa Imo, ang
mas mapaduol sa Imo!
Bisan kini man ang krus nga nagbanhaw
kanako.

263 Bisan pa niana, si Charles Wesley ug silang bantugan nga mga magsusulat nga nagsulat niadtong mga kalantahon nga sama niana, sila'y mga magbabalak. Maanindot gyud kini, nahunahuna ko nga kini maayo gyud kaayo. Ug niadtong adlaw atong . . . Hinumdomi ninyo kana:

Oh Yutang Beulah, matam-is nga Yutang
Beulah,
Sa pinakamataas nga bukid ako nagatindog,
Nga ginatan-aw tabok sa dagat,
Ang lugar kon diin nag-andam Ka og mga
mansyon para sa ako.

264 Madumdoman pa ba ninyo kadtong unang higayon nga nagpakita ang Anghel sa Ginoo didto sa suba? Ang ginakanta nato:

Sa mabalud nga lapyahan sa Jordan ako
nagatindog,
Ug ang mga mata ko nakalantaw nga adunay
pagpangandoy,
Ngadto sa Canaan nga matahum ug
malipayong yuta,
Kon diin didto nahimutang ang akong mga
kabtangan.

Padulong na ako nianang yutang saad,
Kinsa man ang moadto ug mouban kanako?
Padulong na ako nianang yutang saad.

265 Samtang ginakanta nato kana, usa ka Tingog ang nagasinggit gikan sa kalangitan, ug ania nagaabot ang halangdon nga Haliging Kalayo nga nagatuyok papaubos ug ang sulti, "Maingon nga si Juan Bautista gipadala aron sa pag-andam sa Iyang unang pag-abot, aduna ka'y Mensahe nga mag-una sa ikaduhang Pag-abot." Tan-awa ninyo kung asa na kini mipaingon. Trayntay-uno ka tuig na ang milabay. Tan-awa ninyo kung asa na kini nakaabot gikan kaniadto, tibuk kalibutan na diha sa usa ka kalayong rebaybal. Ug karon makita nato nga nagakabugnaw na kini. Haduol na ang panahon.

266 Iduko nato ang atong mga ulo karon, samtang ginadumdom ang tanang mga pahibalo.

267 Gamhanang Magbalantay sa panon, nga ginapaabot namo nga makita sa umalabot nga adlaw, nangandoy ang among mga

kasingkasing alang nianang takna nga makita na namo Siya. Usa niadto ka adlaw atua Ka sa bukid ug gitudloan Mo ang Imong panon, miingon Ka, “Mag-ampo kamo nga ingon niini:”

Amahan namo Nga anaa sa Langit,
Pagabalaanon ang Imong Ngalan.

Umanhi ang Imong Ginghamarian. Pagabuhaton
ang Imong kabubut-on dinhi sa yuta,
maingon sa Langit.

Hatagi kami karon sa pagkaon namo sa matag
adlaw.

Ug pasayloa kami sa among mga sala, maingon
nga nagapasaylo kami sa mga nakasala
kanamo.

Ug ayaw kami itugyan sa mga panulay, kondili
luwasa kami sa kadautan; kay Imo ang
Ginghamarian, ug ang gahum, ug ang himaya,
hangtud sa kahangturan. Amen.

²⁶⁸ Ang sulti sa Biblia, “Ug nanagkanta sila og usa ka himno ug misangyaw.”

Take the Name of Jesus with you,
Child of sorrow and of woe;
It will joy and comfort give you,
Take It everywhere you go.

Precious Name, O how sweet!
Hope of earth and joy of Heaven;
Precious Name, O how sweet! (How sweet!)
Hope of earth and joy of Heaven.

²⁶⁹ Dili ba pagkamaanindot niana paminawon? Mohunong sa’ ta sa kadali, ania’y usa dinhi ug dinha, ug paminawa kini pag-usab samtang ginakanta nato:

Sa Ngalan ni Jesus kita’y magaduko,
Nagahapa diha sa Iyang tiilan, (Kita n’yo?)
Hari sa mga hari sa Kalangitan Siya’y atong
purong-purongan,
Sa dihang ang atong panaw nahuman na.

Oh, dili ba maanindot kana? Tan-awon pa nato:

Dalha ang Ngalan ni Jesus uban kanimo,
Ingon nga usa ka Panagang batok sa tanang lit-
ag;
Sa dihang napalibotan ka sa mga tentasyon,
Litoka lang diha sa pag-ampo ang maong
Balaan nga Ngalan. (Kita n’yo?)

Oh bililhong Ngalan! Ato kining kantahon:

Take the Name of Jesus with you,
As a Shield from every snare;
When temptations round you gather,

Breathe that Holy Name in prayer.

Oh precious Name, (Precious Name!) O how
sweet! (O how sweet!)

The hope of earth and joy of Heaven;

Precious Name, O how sweet! (How sweet!)

Hope of earth and joy of Heaven.

²⁷⁰ Karon, kung mahimo natong iduko ang atong mga ulo,
ipapauli na sa atong pastor ang kongregasyon diha sa pag-ampo.
Panalanginan ka sa Dios, Igsoong Neville.



MGA PANGUTANA UG MGA TUBAG CEB62-0527

(Questions and Answers)

SERYE MAHITUNGOD SA PAMATASAN, KAHAN-AYAN UG DOKTRINA SA IGLESIA

Kining Mensahe ni Igsoong William Marrion Branham, una giwali sa Ingles niadtong Domingo sa gabii, Mayo 27, 1962, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2023 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org